

T2524/1161D

CHINESE - JAPANESE COLLECTION  
HARVARD COLLEGE LIBRARY  
DEPOSITED BY  
HARVARD - YENCHING INSTITUTE  
FEB 11 1936



Harvard College Library Imaging Services <http://imaging.harvard.edu>

CM 0	1	2	3	4	5	6	7	8	9	10	11	12	13	14	15	16	17							
Lab D50.2	95/0/2	81/0/0	66/0/0	51/0/1	35/0/0	20/0/0	29/19/-54	55/-39/33	40/9/-43	42/57/29	82/4/79	51/50/-13	50/-28/-29	38/14/16	66/16/18	50/-5/-22	43/-14/21	55/-9/-25	71/-32/0	62/34/60	52/48/17	31/21/-21	72/-23/57	73/19/68

Blank page with a faint blue rectangular border and extremely faint, illegible text impressions.

Blank page with a faint blue rectangular border and extremely faint, illegible text impressions.

逸周書卷十七

晉孔晁注

江都陳逢衡補注

王會解第五十九

昔之評王會者以爲似考工記似山海經信矣然於名物之晰外夷之考雖有王氏補注猶未備焉茲編採擇羣書凡百餘種尙有不能注釋者幸博雅教之

成周之會

孔注王城旣成大會諸侯及四夷也

補注王應麟曰成周者洛邑之總名成王命周公營

哈佛大學漢和  
圖書館珍藏印

楊山堂  
藏書

成周卜澗水東灑水西爲朝會之地謂之王城是爲  
東都衡案周至東都築而王業成故曰成周竹書紀  
年成王七年王如東都卽此事故王會題爲成周之

會

墀上張赤帟陰羽

王本陰羽  
上有張字

孔注除地曰墀帟帳也陰鶴也以羽飾帳也

潛確類  
書曰汲

冢書目鶴爲陰羽衡案孔注以鶴訓陰非目  
鶴爲陰羽也通雅亦云鶴謂之陰羽俱誤

補注王應麟曰覲禮諸侯覲於天子爲宮方三百步  
四門壇十有二尋深四尺司儀將合諸侯爲壇三成

公於上等侯伯於中等子男於下等幕人朝覲會同  
共帟掌次合諸侯設重帟帟以芘下而承塵易曰鳴  
鶴在陰相鶴經曰鶴陽鳥也而游於陰禽經曰鶴愛  
陰而惡陽故以陰爲鶴

天子南面立統無繁露朝服八十物摺珽

孔注繁露冕之所垂也所尊敬則有焉八十物大小

所服摺插也珽笏也

王本作  
珽似笏

補注天子謂成王南面南鄉也司儀詔王儀南鄉見  
諸侯明堂位天子負斧依南鄉而立其受諸侯覲用

衮冕版廣八寸長倍之前圓後方前俛後仰飾之布  
上元以象天下纁以象地名之曰冕取俛以致敬之  
義故字通作纁繁露者旒也旒綴玉而下垂如露之  
多有聯貫之象故曰繁露今覲諸侯以上臨下故不  
用朝服八十物者天官典絲云凡祭祀共黼畫組就  
之物珽大圭也謂之珽者挺然直上示方正於天下  
無少屈也周禮春官典瑞王晉大圭鄭衆曰晉讀爲  
摺紳之摺謂亩於紳帶之間若帶劍也又冬官玉人  
大圭長三尺杼上終葵首天子服之注王所摺大圭

也或謂之珽終葵椎也爲椎於其杼上明無所屈也  
杼綱也相玉書珽玉六寸明白炤惠士奇禮說曰大  
圭長三尺珽長六寸爲椎頭故曰杼上終葵首杼長  
也方言引燕記曰豐人杼首杼首長首也楚謂之仔  
燕謂之杼諸侯之笏詘前故前短天子之珽杼上故  
上長惠氏此說明晰故又於下特注曰珽比他圭最  
長也或謂珽非大圭則是天子見諸侯僅摺此六寸  
之珽褻矣

唐叔荀叔周公在左太公望在右皆纁亦無繁露朝服七

十物摺笏天子而立於堂上

孔注唐荀國名皆成王弟故曰叔笏謂差在後也近天子故其冕亦無旒也

補注王應麟曰唐叔虞封於堯舊都爲唐侯地理志太原晉陽縣詩唐國在今太原府左氏傳有荀侯世本荀姬姓杜預云河東長脩縣東北有荀城在今絳州玉藻笏諸侯以象曰茶前詘後直五經要義笏以記事防忽忘禮圖云度二尺有六寸中博三寸其殺六分去一晉宋以來謂之手板古笏摺之以記事不

執之以爲儀宇文周百官始執笏衡案高士奇春秋地名攷略曰先儒皆謂荀卽郇考詩云郇伯勞之竹書昭王六年賜郇伯命則郇爲伯爵自不同也逸周書王會解天子南面立唐叔荀叔周公在左孔晁云唐荀皆成王弟是郇爲文昭荀爲武穆又不同也孔疏又止云荀姬姓其爲兩國無疑衡案邗晉應韓武之穆也無所謂荀者疑孔晁注皆成王弟有誤周道親親故周公與唐叔荀叔皆在左太公異姓故在右其冕制之等級周公太公當用衮冕九章唐叔荀叔

當用鷩冕七章七十物者降天子一等也

堂下之右唐公虞公南面立焉

孔注唐虞二公堯舜後也

補注王應麟曰樂記武王克殷未及下車封帝堯之後於祝帝舜之後於陳史記以祝爲薊衡案此不言祝公陳公者從其朔也

堂下之左殷公夏公立焉皆南面纔有繁露朝服五十物皆搢笏

孔注杞宋二公冕有繁露搢笏則唐虞同也

補注王應麟曰史記武王克殷求禹之後得東樓公封於杞書序成王命微子啟代殷後梅福曰封殷於宋紹夏於杞衡案此不言杞公宋公者亦猶稱唐虞之義也王者之後稱公其冕服俱當用衮冕九章此皆外諸侯以臣見君故冕有繁露爲尊敬也

爲諸侯之有疾病者

爲去聲趙曦明曰下文有之此處疑衍

阼階之南祝淮

氏榮氏次之珪瓚次之皆西面彌宗旁之

王本旁之作之旁

孔注淮榮二祝之氏也彌宗官名次珪瓚南差在後補注王應麟曰祝主祭之贊詞宗宗人主神之列位

尊卑能知山川敬於禮儀明神之事者以爲祝能知  
四時犧牲壇場上下氏姓所出者以爲宗古以宗伯  
爲上宗彌宗蓋宗人云阼階東階也瓚者盛鬯酒之  
器以珪爲柄謂之珪瓚衡案東方生氣所在故令淮  
榮氏次之珪瓚蓋用以祈禳也惠士奇禮說曰春官  
太祝小祝男巫女巫皆傳祝由之術此淮榮二祝亦  
古祝由之類惠棟曰大戴公符有祝雍此淮字與相  
似盧文弨曰案雍爲名淮爲氏不必一人  
爲諸侯有疾病者之醫藥所居

孔注使儲左右召則至也

補注王應麟曰此見遇臣之厚處事之周衡案上文  
彌宗歿之王本作彌宗之歿是宋以前所傳本如此  
盧抱經以爲誤倒非也蓋上條所云乃巫用藉藉之  
事以禱祈去病祝由掌之此條醫藥所居當是針石  
之類俾宗人之有職事者掌之故曰彌宗之歿爲諸  
侯有疾病者之醫藥所居此十六字當連爲一條上  
文爲諸侯之有疾病者八字趙氏以爲衍不可從

相者太史魚大行人皆朝服有繁露

相去聲



孔注魚太史名及大行人皆贊相賓客禮儀也

補注周禮春官太史下大夫二人大會同朝覲以書  
協禮事秋官大行人中大夫二人掌大賓之禮及大  
客之儀以九儀辨諸侯之命等諸侯之爵以同邦國  
之禮而待其賓客案天子受諸侯朝覲大宗伯爲上  
擯小行人爲承擯嗇夫爲末擯此言相者太史魚大  
行人者蓋以太史掌策命諸侯之事大行人掌侯國  
納貢之事此殆舉其全節而言之也皆朝服有繁露  
者卿大夫之服自元冕而下如孤之服以其襄事於

外不近天子故有繁露下郭叔同

堂下之東面郭叔掌爲天子棗幣焉纔有繁露

孔注郭叔號叔文王弟棗錄諸侯之幣也

補注王應麟曰左氏傳號叔王季之穆也在畿內謂  
之西號括地志故城在歧州陳倉縣號文公其後也  
唐世系表平王求號叔裔孫序封於陽曲號曰郭公  
號謂之郭聲之轉也衡案晉語胥臣曰文王敬友二  
號謂號仲號叔皆文王之母弟也馬融謂號仲是同  
母弟號叔是異母弟不可從號叔爲文王卿士此郭

叔是其後郭號通公羊傳晉獻公曰吾欲伐郭則虞  
救之伐虞則郭救之又蔡邕郭有道碑文曰王季之  
穆有號叔者實有懿德文王咨之建國命氏或謂之  
郭是也王氏謂此是西號蓋本賈逵號仲封東號號  
叔封西號之說據路史國名紀東號是叔之封萊通  
作錄策部也以簡牘錄其物也周官職幣皆辨其物  
而奠其錄杜子春云定其錄籍也此庭實之物蓋郭  
叔掌之纔有繁露號爲公爵冕服當用九章

內臺西面正北方應侯曹叔伯舅中舅

孔注內臺中臺也應侯成王弟曹叔武王弟皆國名  
爲諸侯二舅成王之舅姜兄弟也

補注應侯武王子左傳邗晉應韓武之穆也王應麟

謂武王封其子於應誤案傳序應於邗晉之下年必

弱於唐叔據紀年唐叔在成王十年始封

十年當作七年案紀年成王七年王如東都卽王會事而此解已云唐叔則受封當卽在此年古十七二字多以形似互錯

則謂應侯封于武王時者誤也漢地理志潁川郡父

城應鄉故國周武王弟所封應劭曰韓詩外傳周成

王與弟戲以桐葉爲圭吾以此封汝周公曰天子無

戲言王應時而封故曰應侯鄉是也臣瓚曰呂氏春秋曰成王以戲授桐葉爲圭以封叔虞非應侯也汲郡古文殷時已自有國非成王之所造也師古曰武王之弟自封應國非桐圭之事也應氏之說蓋失之矣衡案漢志周武王弟當作周成王弟應爲武穆載在魯僖二十四年傳不聞武王有弟封應也桐葉之事固訛顏氏以爲是武王弟亦未爲得也蓋應是古國名商盤庚時已有應侯至成王時始滅以封其弟今河南汝州寶豐縣西南有應城卽故應國也曹文

之昭也史記武王封弟叔振鐸于曹漢志濟陽郡定陶縣故曹國伯舅中舅指異姓侯國言孔以姜兄弟釋此誤王應麟引左氏齊甥舅之國爲解亦誤蓋皆泥于武王妃邑姜之說與爾雅母之舅弟爲舅也不知曲禮明云同姓謂之伯父叔父異姓謂之伯舅叔舅則此伯舅中舅者卽曲禮所謂伯舅叔舅也泛指異姓下文伯父中子泛指同姓必求其人以實之鑿矣

比服次之要服次之荒服次之西方東面正北方伯父中

子次之

孔注此要服於比服轉遠故殊其名非夷狄之四荒也伯父姬姓之國中子於王子中行者

補注王應麟曰服言服王事也比近也以職方九服約之比服其侯甸要服其男采衛荒服其蠻夷鎮蕃與祭公謀父諫穆王謂先王之制有甸侯賓要荒亦與職方異曲禮同姓謂之伯父中子王之支子也衡案比服卽周禮之采衛夏官彤方氏使小國事大國大國比小國注比猶親也則此比服蓋謂去侯服不

遠有依比親密之義其地自當近于要服要取要約之義大行人在甸男采衛之外卽指夷狄之近者言荒服則蕃服也伯父中子同姓之國上文應侯曹叔則同姓之親近者此伯父中子則同姓之疏遠者蓋異姓不必有昭穆之序故統之以伯舅中舅若同姓則天潢之玉牒不可紊故舉伯父以包叔父舉中子以包季弟幼子而昭與昭齒穆與穆齒蓋卽朝廷序爵而親親之義亦在其中矣或曰西方東面正北方伯父中子次之十三字當在比服次之之上與上條

伯舅中舅緊接爲是蓋伯舅中舅伯父中子卽所謂  
侯甸男也一在西面一在東面外則比服要服荒服  
序次井然

方千里之內爲比服方二千里之內爲要服方三千里之  
內爲荒服是皆朝於內者

孔注此服名因於殷非周制也

補注惠氏禮說曰王會篇千里之內爲比服比之言  
親先王之所以親諸侯易之比卦取名於此注云此  
服名因於夏夏之比服周之賓服也衡案今本孔注

是名因于殷惠引作夏不知何據夏比服亦無考禹  
貢要服之內是綏服綏有安撫之義其卽比服之說  
乎周賓服卽比服據國語祭公謀父諫穆王篇次賓  
于甸侯之外要荒之內則比服卽賓服自是確切比  
服當在侯甸男之外約其地有千里之廣故曰方千  
里之內分之則爲采衛合之則爲比服故比亦訓合  
也要服之地與比服相等案禹貢五百里要服周禮  
大行人于衛服之下亦云又其外方五百里謂之要  
服則是要服指夷狄之近者蓋自唐虞以迄殷周總

不過五百里卽兩面算亦不過千里其曰二千里之內者蓋蒙上比服千里而共爲二千里也方三千里之內爲荒服則又蒙上三句而言案荒服卽大行人九州外之蕃國職方則以蠻夷二服當大行人之要服以鎮藩二服當大行人之蕃國據禹貢荒服亦不過五百里周禮大行人邦畿方千里其外侯甸男采衛要各五百里合之至畿共得四千里而蕃國又在此外職方則王畿千里侯服五百里甸服五百里男服五百里采服五百里衛服五百里與大行人同而

無要服五百里另有蠻服五百里夷服五百里鎮服五百里藩服五百里總計有五千五百里蓋大行人其西于蕃國統言之而職方則蠻夷鎮藩又遞界其疆于五百里今以王會計之王畿千里外則侯甸男各五百里其外爲比服當職方之采衛又其外爲要服當職方之蠻夷又其外爲荒服當職方之鎮藩此與大行人並可互證王應麟謂職方九服并王畿方五千五百里此三服方六千里王畿不與焉則是以二千里盡屬要服三千里盡屬荒服也俟考

堂後東北爲赤帟焉浴盆在其中

孔注雖不用而設之敬諸侯也

補注禮玉藻出杆注杆浴器也疏云杆浴之盆也案

設此非不用之物禮云將適公所宿齋戒居外寢沐

浴則以諸侯遠來恐其不潔故令其沐浴而後朝所

以敬君非敬諸侯也

其西天子車立馬乘六青陰羽鳧旌

孔注鶴鳧羽爲旌旄也

補注王應麟曰書五子之歌言六馬漢世此經不傳

多言天子駕四公羊說王度記云天子駕六析羽爲

旌鳧似鴨而小長尾背上有文衡案此天子車旗之

制後世謂之鹵簿六青指馬

中臺之外其右泰士臺右彌士

王應麟曰士一作巫

孔注外謂臺之東西也外臺右泰士右彌士言尊王

泰彌相儀之士也

補注盧文弨曰右泰士之右或疑左謝墉曰中臺之

外其右泰士則在臺之前下云臺右側旁臺而立者

上右字不必疑是左字衡案王應麟以大訓泰以終

訓彌於義不合又謂泰士是上士彌士是中士下士則同是臺外之列何得殊其職而異其分乎惠棟謂泰士理官則惑於左氏榮爲大士之說案是時會同舉行嘉禮焉用刑官而所謂彌士者又將何說以通之乎盧氏謂彌如彌甥之彌案彌甥之彌訓遠與此亦不合然則泰士彌士當何解曰此權設非常職也且是入衛之士非相儀之士也相儀別有司儀肆師等官而此則吉士庶士之流暫衛王所者案是時各國既畢朝於內而又率其屬以陳幣外臺則於中臺

之外自不得不陳列虎賁之士以少備非常蓋不必躬環甲冑如營牆之守故不曰虎賁而曰泰士彌士泰安也彌讀如弭亦安也殆有取於安輯之義乎

受贄者八人東面者四人

孔注受賓幣士也四人東面則西面四人也

補注王應麟曰贄之言至所執以自致衡案受贄受諸侯之貢也九州之外各以所寶爲贄

陳幣當外臺天玄毼宗馬十二

孔注陳束帛被馬於外臺天玄黑毼宗尊也



補注王應麟曰覲禮奉束帛匹馬卓上畫績之事天謂之玄玄與黑別黑者北方之正色六入爲玄則有黑有赤赤者陽之正黑者陰之正惟天體備陰陽之正色博雅毳屬也左氏傳子服景伯曰周之王也制禮上物不過十二以爲天之數也衡案陳幣當外臺五字當爲一節所謂庭實唯國所有也天元毳宗馬十二當另爲一節與下三項皆王朝所設以備觀瞻者毳舊作歇今從王本作毳案集韻毳力涉切音獵鬣良涉切音獵與鬣同髮鬣也鬣力涉切音獵此

三字音切竝同然則毳當作毳毳鬣通謂領毛也明堂位所謂夏后氏駱馬黑鬣是也宗亦不訓尊當與鬣字通或傳寫脫去上半耳蓋謂此所陳之馬其毳與鬣皆天元而其數則十二也王應麟引博雅毳屬也之說則是天元毳爲一物宗馬爲一物矣不可據

王元繚碧基十二

碧基盧從王本作壁綦注同

孔注此下三碧皆玉元繚謂以黑組紐之基玉名有十二也

補注王古玉字元繚黑組也所以束玉亦謂之繚藉

聘禮之絢組尺也或曰王乃天字之誤亦通說文碧石之青美者案山海經西山經之高山北山經之帶山少咸山狐岐山蟲尾山繡山碣石山東山經之栒狀山皆出青碧西山經之章峩山北山經之石者山饒山東山經之竹山中山經之和山傅山皆出瑤碧又西山經之大次山北山經之北躡山湖灌山太行山歸山中山經之光山龍山玉山柴桑山皆出碧又北山經之維龍山有碧玉東山經之耿山多水碧碧山多碧水玉中山經之爽水多碧綠郭景純曰碧亦

玉類也又碧樹見淮南墜形訓注碧青石也唐碧見脩務訓注唐碧石似玉又碧盧見汜論訓廣雅作碧璪漢書地理志越嶲郡會無縣東山出碧宣帝時益州有金馬碧雞之神如淳曰碧形似雞魏略曰大秦國出碧晉大康地記曰雲南青蛉縣出碧他如瑤碧縹碧之類引用不勝枚舉然則此處碧字不必改作圭璧之璧基與璩通省作基璩讀如璩蓋玉之小者亦不必改作基也中山經休與之山其上有石名曰帝臺之棋五色而文其狀如鶉卵博物志作狀如雞

卯又本草石膽別錄云一名棋石然則基讀如綦當  
卽棋也蓋謂玉之成塊如棋子者

參方玄繚璧豹虎皮十二

孔注參方陳幣三所也璧皮兼陳也

補注爾雅肉倍好謂之璧郊特牲虎豹之皮示服猛

也

四方玄繚璧剡十二

孔注剡珪也有鋒銳陳之四方所列之也

也當作地

補注考工記玉人剡圭九寸判規以除慝以易行此

圭銳上而有鋒刃其用鈇利以諭諸侯有不庭者則  
天討有加焉故陳之西方使知所警也

外臺之四隅張赤帟爲諸侯欲息者皆息焉命之曰爻間

四隅下王本有每隅二字爲去聲

孔注每角張帟息者隨所近也諸侯稱爻也

補注說文爻交也丹鉛總錄曰木經云爻者交疏之

牕也其字象牕形今之象眼牕也一牕之孔六十四

六牕之孔凡三百八十四也仁和沈亦然曰諸侯無

爻字之稱古文安字似爻疑本是安字爲諸侯安息

之間耳衡案古人制器命名俱有深義無泛設者是  
以月吉之布則曰象魏所以一衆庶之視也外臺之  
息則曰交間所以聯上下之交也

周公旦主東方所之青馬黑駝謂之母兒

孔注周公主東方則太公主西方東青馬則西白馬  
矣馬名未聞

補注案孔說太泥此會以周公主其事猶湯定獻令  
以伊尹主其事也王應麟引公羊傳自陝而東者周  
公主之亦因孔注而泥若東青馬則西白馬其說更

屬迂贅案上文郭叔掌為天子菜幣而交間之息諸  
侯則周公旦主之當與上交間聯為一節其東方青  
馬黑駝謂之母兒當與下文正北方稷慎大塵正東  
高夷嗛羊一類不應在守營牆之前今以脫去國名  
又復連為一事遂致訛錯

其守營牆者衣青操弓執矛

孔注戟也各異方

王本各作名無方字盧  
本作方各異今仍從舊

補注王應麟曰營牆墮宮之墻也司儀注宮墮土以  
為牆後漢祭祀志為墮重營盧文昭曰案此東方也

故衣青操弓執矛餘方則各異矣注以戟爲矛若依淮南子則春矛夏戟有別也衡案青衣賤者之服不必泥定上文東方二字蓋此是守門之賤故衣青後世兵卒衣青本此其操弓執矛所以拱護王宮孔注所云各異方者謂餘方皆然也穀梁莊公二十五年傳天子救日陳五兵范注矛戟鉞楯弓矢徐邈云矛在東戟在南鉞在西楯在北弓矢在中央又禮記曾子問如諸侯皆在而日食則從天子救日各與其方色與其兵正義引隱義云東方用戟南方用矛西方

用弩北方用楯中央用鼓據此則操弓執矛不必盡在東也高誘淮南時則訓注矛有鋒銳似萬物鑽地戟有枝榦象陽布散則矛與戟爲二物孔以戟訓矛亦誤矛狼藉之屬

西面者正北方稷慎大塵

孔注稷慎肅慎也貢塵似鹿正北內臺北也

補注王應麟曰大行人九州之外謂之蕃國世一見各以其所貴寶爲贄注周書王會備焉書序成王旣伐東夷肅慎來賀史記作息慎山海經大荒之中有

山曰不咸有肅慎氏之國在白民北注去遼東三千餘里後漢書挹婁古肅慎在夫餘東北千餘里東濱大海唐地理志渤海王城其西南三十里古肅慎城說文麋屬急就篇注似鹿尾大而一角漢書粵山多麋麋似鹿而大麋似鹿而小山海經風雨之山即谷之山多麋衡案稷慎即肅慎左傳肅慎燕亳吾北土也淮南墜形訓海外三十六國有肅慎民高誘注肅敬也慎畏也竹書紀年大戴禮五帝德史記五帝紀並作息慎稷息肅古通用肅慎之國見海外

西經又見大荒北經不咸山今之長白山也後魏書勿吉國在高句驪北舊肅慎國也去洛五千里北史勿吉國一曰靺鞨其部類凡有七種自拂涅以東皆石鏃即古肅慎氏也案一統志盛京奉天府承德縣秦以前肅慎氏地又開厚縣鐵嶺縣寧古塔黑龍江等處俱肅慎氏地

穢人前兒前兒若彌猴立行聲似小兒

孔注穢韓穢東夷別種韓鍾本周文歸作寒誤

補注王應麟曰後漢東夷傳滅北與高句驪沃沮南

與辰韓接東窮大海西至樂浪山海經注今扶餘國  
卽濊貊故地在長城北去玄菟千里爾雅注鮠魚似  
鮎四脚前似獼猴後似狗聲如小兒啼大者長八九  
尺水經注廣志曰鮠魚聲如小兒有四足形如鱧出  
伊水史記謂之人魚始皇葬以膏爲燭司馬相如上  
林賦注鮠鮠魚也似鮎有四足聲如嬰兒宋祁益部  
方物圖鮠魚出西山溪谷及雅江狀如鮠四足能緣  
木聲如兒啼衡案穢人穢貊也山海經海內西經謂  
之貊國案穢卽濊一作穢其地與三韓接壤三韓者

馬韓辰韓弁韓也後漢書夫餘國在元菟北千里南  
與高句驪東與挹婁西與鮮卑接北有弱水地方二  
千里本穢地也魏志穢貊南與辰韓北與高句麗沃  
沮接東窮大海案一統志扶餘今爲科爾沁六旗地  
又朝鮮國之江原道爲古濊貊國前兒卽山海經之  
人魚互見北山經中山經其狀如鯀魚四足其音如  
嬰兒食之無癡疾郭注卽鮠也似鮎而四足聲如小  
兒啼郝懿行曰鮠古文省作兒周書王會穢人前兒  
兒从儿卽古文人字又人兒聲轉經文古本作兒魚

闕脫其上卽爲人魚衡案山海經北山經人魚僅一見於沒沒之水而中山經浮濠之水厭染之水楊水漁水視水凡數見又見於西山經之丹水焉得處處皆闕脫其上而爲人魚乎蓋此魚四足若彌猴聲似小兒又能立行以其有似於人故謂之人魚郝氏又於中山經少室山休水鯀魚下引周書直云見若彌猴亦誤案所謂形似彌猴者實是魚不是猴庶物異名疏引周書王會直云前兒猴屬格致鏡原列之獸部猴類俱誤周益公云宐興洞有四足鮎宋乾道六

年行都北關有鮎魚色黑腹下出人手於兩旁各具五指此魚妖也案此卽前兒各具五指卽中山經所謂長距是也益公以爲魚妖直未考耳郝氏又謂北山經歷號水之師魚卽人魚似不甚合若北山經諸懷水之鮎魚魚身而犬首其音如嬰兒食之已狂正與鯢魚相似已狂卽所謂無癡疾也犬首初學記及太平御覽竝引作大首案當是人首前兒貌似人故曰人首也

良夷在子在子幣身人首脂其腹炙之霍則鳴曰在子

幣盧



本作空方今從王  
本霍王本作藿

孔注良夷樂浪之夷也貢奇獸

漢志樂浪郡師古曰樂音洛浪音狼

補注王應麟曰山海經朝鮮在列陽東海北山南注  
今樂浪縣爾雅疏九夷二曰樂浪漢樂浪郡故朝鮮  
國藿豆葉衡案山海經朝鮮在海內北經一統志樂  
浪今爲朝鮮之平安道又含資城吞列城不耐城帶  
方城俱漢樂浪郡屬縣七修類藁載登州老醫毛翹  
自言捕魚海中見有城府欹側半陷水中城樓上有  
榜曰青州白浪縣因謂白浪卽樂浪并引王會良夷

山海經朝鮮作證其說不足據在子不知何物幣疑  
作弊玉篇弊獸名格致鏡原引王會幣身作鼈身並  
附於鼈類之末通雅亦云在子鼈身人首案良夷濱  
於東北海例以穢人前兒揚州禺禺則在子爲水族  
似可信炙之霍者霍卽割廣雅裂也釋名稷霍也所  
中霍然卽破裂王本改作藿又訓爲豆葉於文義不  
甚貫通雅謂炙之以藿以字添設

揚州禺禺魚名解隃寇

寇盧本作寇

孔注亦奇魚也

玩此注則上文奇獸當作奇魚

補注王應麟曰說文鰓魚名皮有文出樂浪東曉神  
爵四年初捕收輸考工周成王時揚州獻鰓上林賦  
禺禺郭璞曰禺禺魚皮有毛黃地黑文衡案下文蠻  
揚爲揚州之蠻漢書南粵傳所謂揚越是也當在揚  
之南境此揚州疑卽禹貢所謂島夷其國當在揚之  
東境呂氏侍君覽有揚島禺禺卽鱣鱣見山海經東山經其狀  
如犁牛博物志東海中有牛體魚其形狀如牛卽此  
禺禺鮓鰓見子虛賦徐廣曰禺禺魚牛也又上林賦  
鰓鰓鮓鮓郭璞曰鰓魚有文彩方言齊宋之間凡物

盛多者謂之寇或曰魚名解隃寇五字疑衍

發人廡廡者若鹿迅走

舊作發人鹿鹿者若鹿迅走誤王本作發人鹿人鹿人者若鹿迅走

盧從史記正義改作廡邵氏爾雅正義引亦作廡今從之

孔注發亦東夷迅疾

補注王應麟曰漢武帝詔曰周成康刑錯不用海外  
肅脊北發渠搜氏羌徠服晉灼曰王恢傳北發月支  
可得而臣似國名也大戴記五帝德曰北山戎發息  
慎管子曰發朝鮮之文皮博物志江漢有貍人能化  
爲虎鹿人蓋此類衡案發國有二一在南史記五帝

紀南撫交趾北發是也此發人自是北狄大戴少閒  
篇盧注北發北狄地名其地出迅足鹿可據管子大  
戴漢詔以發與朝鮮息慎類舉其國蓋在東北故孔  
注謂之東夷東原戴氏引逸周書曰發鹿者若鹿迅  
走謂北發之人貢似鹿獸耳見所校大戴禮案所引  
亦誤今從盧本作麋麋牛尾而一角其大者謂之麋  
麋或作麋麋與麋音相近故楚人謂麋爲麋也竊疑  
此條當是發人麋麋音麋其字上从鹿下从几几與  
几形相似几卽古文人字後世傳寫誤分爲二故王

伯厚所見本爲鹿人也爾雅麋大麋旄毛狗足又云  
猶如麋善登木李時珍曰麋似麋而小黑色豹腳脚  
矮而勁善跳越其說與王會所謂迅走合

兪人雖馬

孔注兪東北夷雖馬嚮如馬一角不角者曰騏

補注王應麟曰漢書巴兪注兪水名今渝州爾雅騏  
如馬一角注元康八年九真郡獵得一獸大如馬一  
角角如鹿茸此卽騏也今深山中人時或見之亦有  
無角者衡案廣韻渝本巴國漢爲巴郡之江州縣梁

於巴郡置楚州隋改爲渝州因渝水爲名案一統志  
今四川重慶府巴縣江津縣璧山縣綦江縣皆其地  
又順慶府有渠江西南流入重慶府合州界東北入  
嘉陵江水經注謂之宕渠水寰宇記宕渠水一名渝  
水此則漢書注所謂渝水也其地當在成都西南與  
孔注東北夷不合又漢書欒布傳以功封郇侯蘇林  
曰郇音榆濟河縣也案漢志清河郡有郇縣亦不在  
東北惟遼西郡之臨渝縣有渝水首受白浪東入塞  
外遼西郡屬幽州幽州東北也今直隸永平府有渝

河在撫寧縣東又山海關在撫寧縣東一百里本古  
渝關地此俞人當在其左近山海經北山經帶山有  
獸焉其狀如馬一角有錯其名曰臚疏郝懿行曰舊  
雖疏俱聲相近廣雅鑄錐也王氏疏證曰爾雅釋獸  
驪如馬一角亦以其角形如錐而名之故逸周書王  
會篇謂之雖馬雖錐聲相近也

青邱狐九尾

孔注青邱海東地名

補注王應麟曰服虔曰青邱國在海東三百里司馬

相如子虛賦秋田乎青邱彷徨乎海外郭氏曰山名  
上有國在海外淮南子堯繳大風於青邱之澤瑞應  
圖九尾狐六合一同則見文王時東夷歸之孝經援  
神契德至鳥獸則狐九尾呂氏春秋禹行塗山有白  
狐九尾造於禹山海經青邱國在朝陽北其狐九尾  
青邱之山有獸如狐而九尾其音如嬰兒能食人注  
竹書曰伯杼征于東海及三壽得一狐九尾衡案青  
邱之澤見淮南本經訓注青邱東方之澤名也青邱  
國見海外東經又見大荒東經晉天文志青邱七星

在軫東南蠻夷之國也案一統志青邱在高麗境高  
麗今朝鮮也唐討高麗置青邱道行軍總管初學記  
卷二十九引圖讚云青邱奇獸九尾之狐

周頭輝羗輝羗者羊也

孔注周頭亦海東夷

補注案山海經有驩頭國周饒國不知誰是此國或  
曰周乃雕字之誤頭與題通蓋卽雕題國也羗同羗  
牡羊也

黑齒白鹿白馬

孔注黑齒西遠之夷也貢白鹿白馬

補注王應麟曰山海經黑齒國在青邱北爲人黑齒  
注齒如漆呂氏春秋禹東至鳥谷青邱之鄉黑齒之  
國東夷傳裸國東南有黑齒國船行一年始可至吳  
都賦注西屠以草染齒染白作黑伊尹朝獻商書正  
西漆齒管子雕題黑齒注南夷之國南夷志黑齒蠻  
在永昌關南以漆漆其齒見人以此爲飾寢食則去  
之周語穆王征犬戎得四白狼四白鹿以歸宋符瑞  
志黃帝時南夷乘白鹿來獻鬯衡案黑齒國見管子

小匡又見呂氏春秋求人篇高誘注東方其人黑齒

因曰黑齒之國也山海經大荒東經有黑齒之國帝  
俊生黑齒姜姓郭注齒如漆也聖人神化無方故其  
後世所降育多有殊類異狀之人諸言生者多謂其  
苗裔未必是親所產黑齒國又見海外東經淮南墜  
形訓自東南至東北方有黑齒民注云東方國也又  
脩務訓東至黑齒注黑齒東方之國魏志東夷傳侏  
儒國去女王國四千餘里又有裸國黑齒國復在其  
東南案以上諸說俱謂黑齒在東南故屈子招魂以

雕題黑齒屬之南方吳都賦亦以儋耳黑齒類敘而  
孔晁謂是西遠之夷者蓋以伊尹四方令有正西漆  
齒之說不知黑齒有二一在東南一在西南伊尹四  
方令之黑齒在西南卽異物志所謂西屠以草染齒  
染白作黑是也而此黑齒則在東南黑齒乃其水土  
使然南夷志謂以漆漆其齒不可信當從郭氏齒如  
漆之說

白民乘黃乘黃者似騏背有兩角

孔注白民亦東南夷

玩孔注亦字東南當作西南

補注王應麟曰山海經白民之國在龍魚北白身被  
髮有乘黃其狀如狐背上有角乘之壽二千歲東夷  
傳九夷有白夷漢郊祀歌訾黃注一名乘黃龍翼而  
馬身黃帝乘之而仙淮南子黃帝治天下飛黃服阜  
注飛黃乘黃出西方狀如狐背上有角乘之壽三千  
歲宋符瑞志舜時地出乘黃之馬衡案白民非東南  
夷也東九夷是白夷非白民白民在西故山海經白  
氏之國列之大荒西經而白民之國亦列之海外西  
經也白氏卽曰民淮南覽冥訓注飛黃出西方則白

民在西信矣墜形訓海外三十六國自西北至西南  
方有白氏高誘注曰白民白身民被髮髮亦白卽此  
白民無疑若大荒東經所云有白民之國帝俊生帝  
鴻帝鴻生白民等語疑是大荒西經有白民之國下  
錯簡路氏帝鴻氏紀白氏銷姓降居于夷是爲白民  
之祖注云汲冢周書有白氏之國出乘黃孔晁云是  
東南夷與白州相接又國名紀曰白民山海經云銷  
姓國而汲冢書言白民之國今之白州孔晁以爲東  
南夷與白州接衡案羅氏所引蓋合後文白州比閩

孔注而言也其說亦誤乘黃神馬也海外西經云乘  
黃其狀如狐其背上有角郭注引周書亦云似狐淮  
南覽冥訓注博物志初學記文選王融曲水詩序李  
注引周書並云似狐而此作似騏未知孰是兩角初  
學記引周書作肉角據宋膺異物志大宛馬有肉角  
數寸北史王劭傳隋文帝所乘騮驢馬脊有肉鞍卽  
是類也符瑞圖云騰黃者神馬也其色黃一名乘黃  
亦曰飛黃或作吉黃或曰翠黃衡案吉黃是犬戎文  
馬之名今以黃字相附遂類舉之誤矣詩傳名物集



覽乃云白氏乘黃犬戎吉黃似騏而有兩角益混

東越海蜃

孔注東越則海際蜃文蜃

補注東越於周為七閩地史記有東越傳乃越王勾踐之後其地為閩越亦稱東越仍沿舊名也秦并天下以其地為閩中郡徐廣曰今建安侯官是索隱曰小顏以為即今之泉州建安也衡案今福建福州府周為七閩地後屬越秦為閩中郡地漢五年為閩越國三國吳屬建安郡隋平陳郡廢改曰泉州唐武德

六年復置泉州是為古東越地也海蜃一名陸見爾雅其狀圓而厚外有紋縱橫一名瓦屋子即蚶子也蚶之大者為淇蚶臨海水土記蚶徑四尺背似瓦壘文即此困學紀聞云周書王會東越海蜃或誤為侮食而王元長曲水詩序用之其別風淮雨之類乎衡案文選王融曲水詩序云侮食來王李善注引周書東越侮食蓋以形近而訛也

歐人蟬蛇蟬蛇順食之美

歐王本作歐

孔注東越歐人也比交州蛇特多為上珍也

王本無比特多

三字盧文弨曰  
此者猶言近來

補注王應麟曰山海經甌居海中注今臨海永寧縣  
卽東甌在歧海中漢以東甌地立回浦縣後漢以章  
安縣之東甌鄉置永寧縣輿地廣記溫台處皆東甌  
地楊氏南裔異物志蚶爲大蚶旣洪且長采色駁犖  
其文錦章食灰吞鹿腴成養創賓享嘉宴是豆是觴  
衡案一統志浙江溫州府處州府春秋時俱屬越漢  
初爲東甌國地卽王伯厚所據以爲歐人者竊疑東  
甌卽東越不得分爲二國此歐人當是西甌卽淮南

人間訓所謂西嘔也漢書南粵王傳佗以兵威財物  
賂遺閩粵西甌駱役屬焉師古曰西甌卽駱越也言  
西者以別東甌也漢書南粵傳又云西有西甌東有  
閩粵寰宇記永嘉爲東甌鬱林爲西甌郡國志又謂  
鬱林是西越案永嘉在浙江溫州鬱林在廣東是東  
越卽東甌歐人卽西越不當混合爲一孔注以爲東  
越歐人誤矣史記南越傳索隱引廣州記交趾九真  
二郡卽甌駱也通典貴州古西甌駱越之地尋按諸  
說歐人當在今廣東廣西境蓋其土俗喜啖蛇故淮

南子云越人得蚺蛇以為上品蓋指此也王氏以此為東歐而以下文且甌為西歐失之蟬蛇路史國名紀引作鱣蛇蟬鱣古通用倦遊雜錄云嶺南人好啖蛇易其名曰茅鱣是也

於越納口

孔注於越越也

補注舊本於越上衍姑字路史國名紀云姑於見王會解又云東越越之分封顧余者號東越又云越一曰於越王會解有於越國徐文靖曰案王會有姑於

越納之文若以姑於為一國則於屬上若以於越為一國則於屬下羅氏兩引王會其旨失矣衡案羅氏所云姑於疑即下文之姊妹於越一曰于越春秋定公五年於越入吳杜預曰於發聲也孔穎達以為越是南夷夷有此發聲漢書貨殖傳注引孟康曰于越南方越名也師古曰于發語聲也戎蠻之語則然于越猶勾吳也王應麟曰納謂納貢案王本直將納下空方刪去故以納貢訓納其實非也通雅曰有納文者曰納布案王會圖於越納注謂納貢也

此指諸國王注

各書貢物而於越總言納字非也必其時已有細納  
縐積之布矣管城碩記曰案沈約宋書高祖微時有  
納布衫襖等皆是敬皇后手自作齊王融有謝竟陵  
王賜納裘啟陳江總有山水納袍賦後魏李平傳賜  
平縑物百段紫納金裝衫甲一領梁簡文帝有謝賜  
鬱泥納袈裟裘劉孝綽有謝越布啟曰比納方綃既  
輕且麗納布之名蓋起於漢周初想未有也據宋本  
草圖經有納龜蘇頌曰龜之無裙而頭足不縮者名  
曰納字亦作鮑漢書音義曰鮑鯢魚相如子虛賦禺

禺鱸鮑是也周書云東越海僉甌人鱣蛇姑於越納  
以類言之納龜鱣蛤皆水族也何得以納爲納布衡  
案位山之駁方氏謂納布之名始於漢是也而以納  
爲龜又以爲卽鮑則大錯矣案納者鮑也卽前兒也  
是魚不是龜廣志謂鯢魚四足如龜特不過狀其形  
耳案諸說都撇却本文納下空方一字故糾纏納字  
實以名物鑿矣據禹貢百里賦納總二百里納銍三  
百里納稭則此云納口者當是粟米之類故重其物  
特云納以貴之也不然下文直言長沙鼈此何不可

言於越龜而乃特變文言納乎正字通解於越納如通雅之說亦誤

姊妹珍妹亡結反

孔注姊妹國後屬越

補注王應麟曰越語句踐之地西至於姑蔑注今大末輿地廣記衢州龍游縣本姑蔑越西鄙春秋公及邾儀父盟于蔑公羊穀梁作昧亡結反妹亦蔑字也珍謂珍物衡案隱元年盟于蔑杜注蔑姑蔑魯地魯國卞縣南有姑城案其地在今兗州府與定公十二

年敗諸姑蔑是一地此姑蔑屬越在今浙江衢州府

龍游縣不得混合為一呂氏春秋本味篇指姑之東

高注指姑乃姑餘山名也在東南方淮南記曰軼鶴

雞於姑餘是也又山海經南山經有勾餘山郭注今

在會稽餘姚縣南句章縣北路史謂姑於見王會解

或卽此羅氏又云周書有句餘蓋句越也今周書無

句餘案姑於姑餘句餘一聲之轉耳珍謂物之可貴

者如蠙珠之類

且甌文蜃

太平御覽九百四十一引周書成王時具區獻蜃下引鄭玄注蜃大蛤也案以且甌為具區又

以孔晁注作鄭注俱誤

孔注且甌在越蜃大蛤也

補注此且甌乃東甌也其地與東越近故東越貢海  
蜃而且甌亦貢文蜃也國名紀云高陽氏後有且甌  
卽此文蜃一名含槩其小者謂之珧後世所謂江瑤  
柱也

其人玄貝

孔注其人吳越之蠻玄貝班貽貝也

補注路史顓頊紀百越之屬有供人卽共人也又國

名紀高陽氏後有供人或云文朗民也今之峯州元  
貝貽貝也見爾雅郭注黑色貝也

海陽大蟹

孔注海水之陽一蟹盈車

楊慎山海經補注引汲冢王會篇云海陽人貢大蟹

其殼專車蓋合正文與孔注言之

補注王應麟曰史記蘇秦曰楚東有海陽山海經大  
蟹在海中又女丑有大蟹注廣千里玄中記北海之  
蟹舉一螯能加於山身故在水中衡案山南爲陽水  
北爲陽此蓋國於海水之北者國名紀海陽見王會

解漢之揭揚今潮之海陽縣案漢志揭陽在南海郡  
今爲廣東嘉應州地又潮州府海陽縣本漢南海郡  
揭陽縣地有海陽山其海陽故城在海陽縣東元和  
志本漢揭陽縣地晉於此立海陽縣屬義安郡南濱  
大海故曰海陽寰宇記引南越志縣南十二里卽大  
海衡謂王會篇所云海陽當是漢志遼西郡之海陽  
案呂氏春秋恃君覽夷穢之鄉大解陵魚大解卽大  
蟹也穢卽濊貊合之元中記北海之說則此國蓋在  
東北故山海經女丑有大蟹列之大荒東經而海內

北經類敘大蟹在海中於朝鮮列姑射之次也若在  
廣東潮州府則南海而非北海矣郭氏山海經注謂  
大蟹廣千里不足信

自深桂

孔注自深亦南蠻也

補注謝墉曰自深當卽鼻深衡案自當作目路史國  
名紀高陽氏後有目深國卽山海經深目之國是也  
互見海外北經大荒北經尸子亦云四夷之民有深  
目者然則深目目深互文耳蓋其地近南故產桂卽

交趾肉桂之類

會稽以鞮皆西嚮王本皆下有面字

孔注其皮可以冠鼓自大塵以下至此向西面也

補注王應麟曰越絕傳禹封大越上苗山會計更名

會稽山山海經江水多鼉注似蜥蜴長二丈有鱗彩

皮可以冒鼓詩鼉鼓逢逢疏云四足長丈餘甲如鎧

皮堅厚宜冒鼓衡案會稽之山已見山海經此蓋因

山以立國者山在今浙江紹興府會稽縣東南三十

里秦漢皆為會稽郡地國名紀王會解有會稽或云

卽越蓋自一國

正北方義渠以茲白茲白者若白馬鋸牙食虎豹

王融曲水詩序

注引周書西方正北曰義渠獻茲白茲白者若馬鋸齒食虎豹

孔注亦在臺北與大塵相對義渠西戎國茲白一名

駁

補注王應麟曰西羌傳涇北有義渠之戎地理志北

地郡義渠道秦縣也括地志寧原慶三州秦北地郡

戰國為義渠戎國之地爾雅駁如馬鋸牙食虎豹山

海經中曲山有獸如馬而身黑三尾一角虎牙爪音



如鼓名曰駮食虎豹可以禦兵博物志茲白狀如酋  
耳尾長參其身食虎豹說苑師曠曰駮之狀有似駮  
馬衡案漢匈奴傳岐梁涇漆之北有義渠之戎一統  
志甘肅慶陽府春秋戰國義渠戎地又郁郅故城今  
安化縣治本義渠戎地又義渠故城在寧州西北元  
和志寧州古公劉邑周爲義渠戎國秦爲北地郡地  
駮馬鋸牙食虎豹見爾雅與海外北經而西山經中  
曲之山所載形狀稍異博物志所云蓋以下文央林  
酋耳混入誤矣

央林以酋耳酋耳者身若虎豹尾長參其身食虎豹

孔注央林戎之在西南者

補注王應麟曰山海經林氏國有珍獸大若虎五彩  
畢具尾長於身名曰騶吾乘之日行千里注六韜云  
紂囚文王閔天之徒詣林氏國求得此獸獻之紂大  
說乃釋之吾宜作虞書大傳散宐生之於陵氏取怪  
獸大不辟虎狼間尾倍其身名曰虞注間大也虞蓋  
騶虞也周書曰英林酋耳於陵英林音相邇其是乎  
淮南子散宐生得騶虞雞斯之乘衡案書大傳於陵

氏六韜作林氏國蓋陵林古通用也郝懿行海內北  
經注謂卽王會篇之央林以林氏國所產之騶虞與  
酋耳形狀相類郭氏圖贊云怪獸五彩尾參其身矯  
足千里儵忽若神是謂騶虞詩嘆其仁卽是物也瑞  
應圖酋耳似虎而大見虎豹卽殺之太平卽至

北唐以閭閻似隄寇

寇盧本作寇

孔注北唐戎之在西北者射禮以閭象爲射器

補注王應麟曰山海經縣雍之山其上多玉其獸多  
閭注閭卽羴也似驢而歧蹄角如靈羊一名山驢輝

諸之山其獸多閭荆山多閭女几之山多閭風雨之  
山多閭鄉射禮於郊則閭中注閭獸名如驢一角或  
曰如驢歧蹄北唐卽晉陽也詩晉謂之唐傳曰晉居  
深山戎狄之與鄰鄧立誠曰案北唐者漢書地理志  
中山國唐縣注堯山在南應劭曰故堯國也唐水在  
西張晏曰堯爲唐侯國於此堯山在唐東北望都界  
孟康曰晉荀吳伐鮮虞及中人今中人亭據此數說  
斯則北唐之的解也必加北者所以別于晉陽之唐  
及當陽春陵之上唐鄉也衡案山海經綸山美山卽

谷之山皆多閭並見中山經案是物似羊非羊似驢  
非驢故廣志直謂之驢羊也廣志引見初學記然則  
正文喻卽羴字之誤蓋謂閭似羴也寇字當衍南史  
滑國野驢有角卽閭又西山經錢來之山有獸其狀  
如羊而馬尾名曰羴羊郭注今大月氏國有大羊如  
驢而馬尾

渠叟以鼯犬鼯犬者露犬也能飛食虎豹

文選王融曲水詩序注引渠搜

獻鼯犬鼯犬露犬也能飛食虎豹

孔注渠叟西戎之別名也

補注王應麟曰禹貢渠搜地里志朔方有渠搜縣水  
經河自朔方東轉經渠搜縣故城北西域圖記鉢汗  
國在葱嶺之西五百餘里古之渠搜國山海經馬成  
之山有獸如白犬而黑頭見人則飛露犬蓋此類衡  
案鼯犬獵犬也露有盧音說苑所謂韓氏之盧是也  
故能飛食虎豹王氏所引山海經見北山經案此獸  
名曰天馬是馬不是犬且不云食虎豹通雅亦謂鼯  
犬卽山海經馬成山之露犬蓋由王說而誤案山海  
經並不云此是露犬大戴禮少閒篇注渠搜貢虛犬

虛蓋虛字之誤

今孔本汪本大戴禮並據王會改作露字

徐文靖管城碩

記謂曹操經白狼山逢獅子忽一物如狸跳上獅子

頭獅子伏不敢起卽是此物不可據盧文弨曰案廣

韻斲比教反能飛食虎豹之屬正此是也說文斲胡

地風犬王本從李善注文選作斲云一作斲之若切

案斲乃小鼠李注或字訛不可從

樓煩以星施星施者珥旄

孔注樓煩北狄也施所以爲旄羽珥

盧文弨曰李善注甘泉賦流星

旄以電燭引樓煩星旄星旄者羽旄也北堂書鈔百二十引作樓煩黑旄鳧羽旄也恐訛衡案說文七篇

於部施旄旄旄也从於也聲齊彙旄字子旗知旄者旗也據此則當作星施爲是案彙旄字子旗見左昭三年傳又鄭豐旄字子旗見左昭十六年傳又孔子弟子巫馬旄亦字子旗古人名字命意俱相關合

補注王應麟曰匈奴傳晉北有樓煩之戎伊尹朝獻

商書正北樓煩地理志鴈門樓煩縣故樓煩胡也旄

以旄牛尾山海經潘侯山有獸狀如牛而四節生毛

名曰旄牛注背膝及胡尾皆有長毛爾雅攬牛旄牛

也顏師古曰今謂偏牛楊雄甘泉賦流星旄以電燭

荀子西海文旄衡案一統志山西寧武府春秋樓煩

地又忻州有樓煩故城在靜樂縣南七十里又代州

樓煩故城在崞縣東古樓煩國又保德州戰國爲樓煩地星施蓋卽熊旗五游以象伐星之類珥旄謂以犛牛尾析而着旗之兩旁也

卜盧以紈牛紈牛者牛之小者也

盧文弨曰紈字舊脫初學記有之又見李善注

或誤作紈衡案王融曲水詩序紈牛露犬之玩李善注引周書曰卜盧國獻紈牛紈牛小牛也又王勃乾元殿頌紈牛露犬之貢俱誤作紈

孔注卜盧盧人西北戎也今盧水是

補注王應麟曰牧誓微盧彭濮人注盧在西北立政

夷微盧烝括地志房州竹山縣及金州古盧國左氏

傳有盧戎紈與紈同詩有捋其角球曲貌穀梁傳斛

角注球球然角貌衡案唐房州卽今湖北鄖陽府房

縣秦漢之房陵縣也舜封堯子丹朱于房卽此地春

秋時爲房子國其竹山縣則爲秦上庸縣地漢屬漢

中郡本周之庸國王氏引括地志以爲古盧國不知

何据左傳文十四年盧戢黎盧與盧同杜注今襄陽

中盧縣段長基歷代疆域表引元和志云秦時謂之

伊盧項羽亡將鍾離昧家在伊盧是也衡案後漢郡

國志東海郡有伊盧鄉注史記曰鍾離昧家在伊盧

則伊盧在東海郡中盧在南郡相去甚遠段氏引以注中盧誤矣案今湖北襄陽府南漳縣東春秋盧戎地於晉屬襄陽郡晉地理志襄陽無盧水且不在成周西北水經注濰水又北右合盧水卽久台水地理志曰水出瑯邪橫縣故山王莽之令邱也山在東武縣故城東南世謂之盧山也齊地記曰東武城南有盧水案其地在漢志瑯邪郡此所謂盧卽職方兗州之浸也當在成周東南與所謂西北戎亦不合然則卜盧果何屬案卜與濮通此必在百濮左右故曰卜

盧然亦東南蠻非戎也若必從孔氏西北戎之說則漢書西域傳戎盧國可以當之

今新疆巴爾呼都克爲漢戎盧國

同隸見廣韻集韻又通作觥詩兕觥其觥是也穀梁

注見成七年

觥當作觥

爾雅隸戴也考工記角長二尺有

五寸三色不失理謂之牛戴牛蓋謂此牛之角復有一牛之直故曰戴然則王會統牛當亦指其角而言也寰宇記九德出果下牛此云牛之小者當類是

區陽以鼈封鼈封者若龜前後有首

盧文弔曰舊本鼈封不重從洪容齋及王

本補衡案周文歸區陽以鼈句封者若龜句蓋不知鼈封卽山海經之并封又於注內添封大也三字真杜撰矣

孔注區陽亦戎之名

補注胡應麟曰王會怪鳥奇獸多出入山海經其稱區陽以鼈封鼈封者若彘前後有首孔氏無注王伯厚補云盛宏之荊州記武陵郡西有陽山山有獸如鹿前後有頭常以一頭食一頭行然不明言鼈封考山海經第七卷并封在巫咸東其狀如彘前後皆有首蓋卽此物也衡案并封見海外西經又大荒西經大荒之中有山名曰麇鑿有獸左右有首名曰屏篷郭注卽并封也語有輕重耳郝懿行以左右有首與

海外西經前後有首之文不同遂謂似非一物不知準以一頭食一頭行之說此物實是左右有首橫布之則若前後有首也故山海經又云赤水之西流沙之東有獸左右有首名曰跖踢又延維左右有首亦見山海經吳任臣山海經廣注引游氏臆見云西區陽有鼈封謂之兩頭鹿衡案區陽上不應添西字又以爲兩頭鹿俱誤又引史弇云神功元年安國獻兩首犬亦并封類

案古來兩首物甚多兩頭蛇見爾雅郭注兩頭鹿見華陽國志博物志雙頭雞見集異志兩首龜見山

堂肆考兩頭虱見酉陽雜俎

規矩以麟麟者仁獸也

孔注規矩亦戎也麟似鹿牛尾一角馬蹄也

補注規矩國名無考盧從王本作規規亦無考故仍從舊王應麟曰爾雅麇麇身牛尾一角角端有肉陸璣疏云音中鐘呂行中規矩不履生蟲不踐生草王者至仁則出宋符瑞志成王時麒麟游苑衡案說苑辨物麒麟行步中規折旋中矩廣雅亦云然則規矩命國其殆以此歟

西中以鳳鳥鳳鳥者戴仁抱義掖信

舊本掖信下有歸有德三字

孔注其形似雞

王本作似鶴誤

蛇首魚尾戴仁向仁國抱義

懷有義掖信歸有信也

舊本歸有信也作歸有德之君也

補注後漢西羌傳宣王征申戎疑卽此西中也山海經南山經丹穴之山有鳥其狀如雞五采而文名曰鳳凰首文曰德翼文曰義背文曰禮膺文曰仁腹文曰信又海內經所載與此小異韓詩外傳天老曰夫鳳象鴻前麟後蛇頭而魚尾龍文而龜身燕頤而雞喙戴德負仁抱忠挾義說苑辨物鳳首戴德頂揭義背負仁心信智翼挾義衷抱忠足履正尾繫武抱朴



子曰木行爲仁爲青鳳頭上青故曰戴仁也金行爲義爲白鳳纓白故曰纓義也火行爲禮爲赤鳳背赤故曰負禮也水行爲智爲黑鳳胸黑故曰向智也土行爲信爲黃鳳足下黃故曰蹈信也

氏羌以鸞鳥

孔注氏羌地羌不同故謂之氏羌今謂之氏鸞大

王本

作於鳳亦歸於仁義者也

補注王應麟曰商頌自彼氏羌牧誓羌髡說文西方羌从羊地理志隴西有氏道羌道氏夷種名羌卽西

域媯羌之屬括地志隴右岷洮叢等州西羌也黃氏曰羌古姜姓三苗之後居三危爾雅疏戎類曰耆羌山海經氏羌乞姓賈捐之曰成王地西不過氏羌山海經女牀之山有鳥狀如翟而五彩文名曰鸞鳥見則天下安寧說文鸞赤色五彩雞形鳴中五音頌聲作則至成王時氏羌獻焉漢蔡衡曰凡象鳳者五多青色者鸞徐鍇曰鸞似鳳而青與說文異瑞應圖鸞鳥赤神之精鳳皇之佐尙書中侯周公歸政於成王太平制禮鸞鳥見禽經鸞鳴嗒嗒鳳鳴啾啾淮南子

羽嘉生飛龍飛龍生鳳皇鳳皇生鸞鳥衡案一統志  
四川龍安府松潘衛古氏羌地又甘肅階州陰平故  
城在文縣西北古氏羌地鸞狀如翟見山海經西山  
經郭注周成王時獻之卽指此說文瑞應圖俱謂鸞  
鳥赤色蔡衡徐鍇及埤雅並云青鳳爲鸞而禽經則  
又云黃鳳謂之鸞殆所謂傳聞異詞者歟

巴人以比翼鳥

孔注巴人在南者比翼鳥不比不飛其名曰鸛鸛

補注王應麟曰左傳注巴國在巴郡江州縣今渝州

巴縣郡縣志渝州古巴國也閬白二水東南流曲折  
如巴字故謂之巴武王伐殷巴人助焉其人勇銳歌  
舞以凌殷郊後封爲巴子其地東至魚腹西連夔道  
北接漢中南極牂柯山海經後照始爲巴人爾雅南  
方有比翼鳥焉不比不飛其名謂之鸛鸛注似鳧青  
赤色山海經崇吾之山有鳥其狀如鳧而一翼一目  
相得乃飛名曰蠻蠻見則天下大水注比翼鳥也南  
山在結匈東南比翼鳥在其東其爲鳥青赤兩鳥比  
翼管仲曰西海致比翼之鳥瑞應圖王者德及高遠

則至王嘉拾遺記成王時燃邱國獻之狀如鵲而多力張華以爲一青一赤在參嶠山衡案巴國見山海經海內經郭注今三巴是一統志四川重慶府忠州禹貢梁州之域周爲巴國地又重慶府江州故城在巴縣西本巴國都左傳文公九年巴子使韓服告楚請與鄧爲好杜注江州故巴國華陽國志秦惠文王遣張儀滅巴城江州又保寧府禹貢梁州之域春秋巴國別都巴州在府東北古巴國地又有小巴山在南江縣東北周地圖云此山之南卽古巴國水經注

言林邑城外有比翼鳥不比不飛名曰歸飛格至鏡原鳳類引瑯嬛記云南方有比翼鳳飛止飲食不相分離雄曰野君雌曰觀諱總名曰長離言長相離著也其形與鸚鵡不同疑另一物案爾雅謂此鳥在南方韓詩外傳亦云南方有鳥名曰鸚而管子則云西海今以王會巴人考之則此鳥蓋出於西南故山海經旣列之西山經而又列之海外南經也

方揚以皇鳥

揚盧從王本作揚

孔注方揚亦戎別名皇鳥配於鳳者也

補注方揚疑亦揚越之別種孔謂是戎別名當與下文方人爲一類皇鳥鳳之匹郝懿行以北山經軒轅山黃鳥當之與邵氏爾雅正義同予案大荒北經附禹之山有皇鳥又有黃鳥明是二鳥不得據爾雅皇黃鳥之說謂卽一物也再考大荒西經北狄之國有五采鳥一曰皇鳥一曰鸞鳥一曰鳳鳥是方揚所貢皇鳥與上西申之鳳氏羌之鸞同爲太平之應爾雅所謂鷗鳳其雌皇是也孔注所謂皇配於鳳者解釋確切王應麟補注從同邵氏郝氏之說不足據

蜀人以文翰文翰者若臯雞

孔注鳥有文采者臯雞似鳧冀州謂之澤特也

王本也字

下多臯一作皇四字

補注王應麟曰蜀見於牧誓華陽國志蜀之先肇於人皇之際黃帝爲子昌意娶蜀山氏後子孫因封焉寰宇記蠶叢始稱王次日栢灌次日魚鳧其後杜宇號望帝以褒斜爲前門熊耳靈關爲後戶玉壘峨眉爲池澤禪位於開明白開明而上至蠶叢凡歷千歲秦以其地爲蜀郡衡案寰宇記之說蓋據蜀本紀其

言不足憑信當武王伐紂時蜀與羌髳七國不期來助殆亦子男國耳其先世微末荒略難考稱王據險大都在周末之時案一統志四川城都府禹貢梁州之域自古爲蜀國臧玉林經義雜記曰案臯雞當爲翬雉之誤說文羽部翰天雞赤羽也从羽韋聲逸周書文翰若翬雉一名鷦風周成王時蜀人獻之是許氏所見周書本作翬雉而不作臯雞爾雅釋鳥翰天鷄郭注翰鷄赤羽逸周書曰文翰若采鷄成王時蜀人獻之疏曰文翰若采鷄者王會篇文也彼云蜀人

以文翰文翰者若翬雉是邢氏所見周書亦作翬雉而不作臯雞而徵引原文稱彼以別乎郭注郭注又引作采雞者案釋鳥伊洛而南素質五采皆備成章曰翬疏引李巡曰素質五采備具文章鮮明曰翬孫炎曰翬雉白質五色爲文也是采雞爲翬雉之訓郭注蓋以詁訓代經須人易曉故耳觀邢疏所引知北宋周書不誤以王氏補注考之則南宋本已誤矣後之校刊此書者宜據說文爾雅疏正之又說文鳥部云翰雉肥翰音者也从鳥韋聲魯郊以丹雞祝曰以

斯鶡音赤羽去魯侯之咎又見風俗通祀典此亦翬雉之類審諸家所解知孔注似鳧之言為誤矣

方人以孔鳥

孔注方人亦戎別名孔與鸞相匹也匹也王本作配者

補注王應麟曰東夷傳九夷有方夷竹書紀年少康

卽位方夷來賓孔雀生南海蓋鸞鳳之亞藝文類聚

引周書曰成王時西方人獻孔雀山海經南方多孔

鳥春秋元命苞火離為孔雀異物志大如鴈而足高

細頸龍背似鳳自背及尾皆珠文五采光耀長短相

次羽毛末皆員文五色相繞頭戴三毛長寸以為冠

足有距迎晨則鳴相和人指其尾則儻交州記色青

尾長六七尺能舒舞足為節衡案山海經孔鳥見海

內經類敘於南方贛巨人之末西域傳罽賓國出孔

雀續漢書西南夷滇池出孔雀又西域條支國出孔

雀然則此鳥多產于西南王氏引東夷傳似不甚合

藝文類聚引周書以為西方人據此則方夷在東方

人在西亦猶東屠西屠云爾

卜人以丹沙沙一作砂

小人 孔注小人西南之蠻丹沙所出

補注王應麟曰太平御覽小人蓋今之濮人也伊尹  
為四方獻令正南百濮牧誓注濮在江漢之南爾雅  
南至於濮鈇郡國志越巂會無縣華陽國志曰故濮  
人邑左氏傳巴濮吾南土也劉伯莊曰濮在楚西南  
鄭語楚蚡冒始啓濮禹貢荊州貢丹山海經柁山多  
丹粟注細丹砂如粟荀子南海有丹干本草丹砂生  
符陵山谷職方氏荊州其利丹銀衡案此小人即百  
濮之一詳見下四方令丹沙朱砂也

夷用闌木

闌木一作闌采

孔注夷東北夷木生水中

木一作采

黑色而光其堅若鐵

補注王應麟曰山海經夷人在東胡東崔豹古今注

烏文木出波斯國集韻闌木名茲消切南方草木狀

文木樹高七八尺色正黑如水牛角衡案王氏如孔

晁之說故引山海經之夷人然烏文木不出於東北

也春秋隱公元年紀伐夷夷妘姓今山東膠州即墨

縣西廢北武城即古夷國或曰夷用闌木與肅慎大

塵穢人前兒文法一例用字不作以字解路史風俗

通云古用國見毛詩在高唐說見國名紀周世侯伯  
案高唐亦齊地舊本闕木作閩采采謂采石卽禹貢  
青州怪石之類山海經槐江之山其陰多采黃金銀  
漢地理志豫章郡有黃金采則采是黃色又說文四  
篇今閩鳥名似雉鴝而黃然則閩采之爲黃猶翡翠  
之爲綠也玉篇閩力進切

康人以桴苡桴苡者其實如李食之宜子

孔注康亦西戎別名也食桴苡卽有身

補注王應麟曰隋書康國康居之後也唐以其地爲

康居都督府漢西域傳康居去長安萬二千三百里  
說文芣苢一名馬舄其實如李令人宜子周書所說  
或从以山海經芣苢木也王肅引周書云芣苢如李  
出於西戎王基駁云王會所記雜物奇獸皆四夷遠  
國各齎土地異物以爲貢贄非周南婦人所得采芣  
苢爲馬舄之草非西戎之木也衡案康人康居之先  
也今新疆左哈薩克右哈薩克爲漢魏康居國地在  
準爾噶部之西北晉書康居在大宛西北二千里魏  
書者舌國故康居國也唐書康在密那水南詩釋文



云山海經及周書王會皆云芣苢木也實似李食之  
宐子出於西戎案山海經西山經崇吾之山有木焉  
員葉而白柎赤華而黑理其實如枳食之宐子孫說  
與周書相似然未明言是芣苢蓋康人所獻者自是  
芣苢木周南所咏者自是芣苢草以其食之均能宐  
子故異物而同名藝文類聚引郭氏圖贊曰車前之  
草別名芣苢王會之云其實如李名之相亂在乎疑  
似此贊分疏確切不易

州靡費費其形人身反踵自笑笑則上脣翕其目食人北

方謂之吐噎

孔注州靡北狄也費費曰臯羊好立行如人被髮前  
足指長

補注王應麟曰漢書隰陽費費也人面黑身有毛反  
踵見人則笑脣蔽其目山海經臯陽國在北胸之西  
其爲人人面長脣黑身有毛反踵見人笑亦笑左手  
操管注海內經謂之顛巨人今交州南康郡深山中  
皆有此物也長丈許脚跟反向健走被髮好笑雌者  
能作汁灑中人卽病土俗呼爲山都南康今有顛水

以有此人因以水名爾雅狒狒如人被髮迅走食人  
說文成王時州靡國獻嚙或作狒左思吳都賦萬萬  
笑而就格衡案山海經大荒西經有壽麻之國壽麻  
卽州靡呂氏春秋任數篇南服壽靡高誘注云西極  
之國卽此又漢地理志益州郡有收靡李奇云靡音  
麻然則此國當在西南不當云北狄也故山海經梟  
陽國列之海內南經蓋以地出梟陽卽以此名其國  
梟陽卽梟羊淮南汜論訓山出梟陽高誘注梟陽山  
精也人形長大而黑色身有毛反踵見人則笑唇蔽

其目俱與王會所說費費同御覽九百八萬萬音翠  
其引爾雅說文山海經及圖贊並作萬萬案爾雅本  
作狒狒說文作嚙讀若費符味切其引周書爾雅竝  
作嚙嚙海內南經注引周書爾雅竝作髣髣爾雅疏  
引圖讚作狒狒集韻八未嚙或作狒萬嚙萬廣韻  
引說文作嚙扶涕切萬狒並同案以上諸書所引字  
形各異其實一也若吐嚙則又一物案山海經西山  
經崑崙之山有獸焉其狀如羊而四角名曰土嚙是  
食人廣韻亦云土嚙似羊四角其銳難當觸物則斃

食人蓋卽下文高夷噍羊羊而四角也此食人北方  
謂之吐嘍八字定屬高夷下錯簡

都郭生生欺羽生生若黃狗人面能言

舊本都郭生生下  
無欺羽生生四字

今據王  
本補

孔注都郭北狄生生獸名

補注王應麟曰山海經汜林方三百里在狺狺東狺  
狺知人名其爲獸如豕而人面爾雅猩猩小而好啼  
注山海經人面豕身能言語今交阯封谿縣出猩猩  
狀如獼狨聲似小兒啼荀子曰猩猩能言笑亦二足

無毛博物志若黃狗與周書同左思吳都賦猩猩啼  
而就擒淮南萬畢術猩猩知往郭璞贊曰厥狀似猴  
號音若嬰水經注形若狗而人面頭顏端正善與人  
言音聲妙麗如婦人衡案都郭國名無考郭注海內  
南經引作鄭郭未知孰是生生山海經作狺狺爾雅  
作猩猩淮南汜論訓注猩猩北方獸名人面獸身黃  
色則都郭爲北狄信矣然蜀志謂封溪縣有獸曰猩  
猩南方草木狀亦云猩猩之獸生在野中狀如狨子  
交阯武平興古有之則是物蓋出西南不當在北方

也至其形狀高誘淮南注博物志水經葉榆河注並云若黃狗與王會同山海經則云如豕郭注爾雅以爲狀如獾狍其注海內南經旣云狀如黃狗又以爲狀如豚腹似狗其於圖讚則又云厥狀似猴何其互舛若此又郭注海內南經引周書無欺羽二字而於人面下連接頭如雄雞食之不眯八字郝懿行曰其頭如雄雞二句彼文所說奇幹善芳自別一物此注不加剗削妄行牽引似非郭氏原文或後人寫書者羸入之耳衡案郭氏所引斷非後人羸入之語說具

見下又通雅引王會狡犬鼪犬之下忽綴以東郭生欺羽能逐虎九字豈以生生欺羽爲犬類乎陳大章詩名物集覽引以釋遇犬獲之而不闢其說亦謬又一切經音義卷三猩猩知人名如豕人面又似黃狗頭如雄雞出交阯封溪聲如小兒啼蓋又因山海經郭注而誤

奇幹善芳善芳者頭若雄雞佩之令人不昧皆東嚮

孔注奇幹亦北狄善芳鳥名不昧不忘也此東嚮列次也

補注王應麟曰山海經翼望之山有鳥其狀如鳥三首六尾而善笑名曰鵠鵠服之使人不厭注不厭夢也周書云服者不昧或曰眯眯目也善芳太平御覽作獻茅衡案奇幹國名無考格致鏡原引作奇翰誤郝注山海經引作奇榦善芳爲物亦無考鵠鵠見山海經西山經卽是王會之欺羽鵠鵠音猗餘與欺羽音相近又卽春秋繁露郊語篇所云鴟羽去昧是也鴟羽亦欺羽之轉去昧卽不昧高誘淮南注楚人謂厭爲昧然則服之使人不厭卽所謂佩之令人不昧

也據此則上文欺羽二字當在此條今本誤刻入上文耳故孔注亦謂善芳是鳥名也余意古本當是都郭生生欺羽生生若黃狗人面能言鵠鵠善笑頭若雄雞佩之令人不昧蓋一國貢二物故連敘而及郭氏引注山海經截去欺羽二字遂連生生爲一條而以頭若雄雞二語續之則似爲一物矣故水經葉榆河注亦云生生甘美可以斷穀窮年不厭案不厭二字與生生無著則以王會此條古來脫誤已久故引用者承襲而不知其誤也余謂欺羽轉爲鵠鵠鵠鵠

誤爲奇幹而善笑又誤爲善芳自是定論通雅據太平御覽謂鵠鷄卽獻茅鳥亦誤王融曲水詩序奇幹善芳之賦李善注引周書曰成王時貢奇幹善芳者頭若雄雞佩之令人不昧竟以奇幹善芳四字聯名失之

北方臺正東高夷嘽羊嘽羊者羊而四角

孔注高夷東北夷高句驪

補注王應麟曰爾雅疏九夷三曰高驪東夷傳高句驪在遼東之東千里南與朝鮮濊貊東與沃沮北與

夫餘接述異記成王時東夷進六角羊亦嘽羊之類後漢書冉駹夷有五角羊衡案高夷高句驪之先也一統志古高句驪國在朝鮮咸興府東北漢縣爲元菟郡治後魏書高句驪者出於扶餘自言先祖朱蒙母河伯女夫餘王閉於室中爲日所照引身避之日影又出旣而有孕生一卵大如五升棄之於豕豕不食棄之於路牛馬避之又棄之野衆鳥翼之夫餘王剖之不能破遂還其母其母以物裹之置於煖處有一男破殼而出及其長也字之曰朱蒙其俗言朱蒙

者善射也夫餘國人以朱蒙非人所生將有異志請  
除之王不聽命之養馬朱蒙每私試知其善惡駿者  
減食令瘦駑者足食令肥夫餘王以肥者自乘瘦者  
給朱蒙後狩於田以朱蒙善射則給之一矢朱蒙雖  
一矢殪獸甚多夫餘之臣又謀殺之朱蒙母陰以告  
朱蒙棄夫餘東南走中道遇一大水欲濟無梁夫餘  
人追之甚急朱蒙告水曰我是日子河伯外孫今日  
逃走追兵垂及如何得濟於是魚鼈並浮爲之成橋  
朱蒙得渡魚鼈乃解追兵不得渡朱蒙至普述水遇

見三人其一人衣著麻一人著衲衣一人著水藻衣  
與朱蒙至紇升骨城遂居焉號曰高句驪因以爲氏  
焉衡案高夷已見王會焉得爲夫餘之別種或曰此  
言朱蒙是河伯外孫則河伯是夏殷時侯伯焉知非  
立國於夏乎且其俗謂朱蒙善射則又逢蒙學射於  
羿而因有善射爲蒙之語也予謂魏書旣以高句驪  
爲夫餘別種則當先求夫餘立國之始案後漢書夫  
餘國在元菟北千里本穢地也初北夷索離國王出  
行其侍兒於後妊身王還欲殺之侍兒曰前見天上

有氣大如雞子來降我因以有身王囚之後遂生男  
王令置於豕牢豕以口氣噓之不死復徙于馬蘭馬  
亦如之王以爲神乃聽母收養名曰東明東明長而  
善射王忌其猛復欲殺之東明奔走南至淹淲水以  
弓擊水魚鼈皆聚浮水上東明乘之得度因至夫餘  
而王之焉此則夫餘立國之始也夫何東明以魚鼈  
得免而朱蒙又以魚鼈得渡也夫何兩人皆以善射  
聞而一則以有氣來降一則以日影來照而生也最  
可疑者東與朱字形相近而明與蒙則又聲之轉也

豈非不知高夷所自始故神其事以爲荒遠之說乎  
噍羊形狀與山海經吐噍同上文費費下食人北方  
謂之吐噍八字當在此述異記謂周成王時東夷進  
六角羊蓋四角之誤又西山經錢來之山有獸焉其  
狀如羊而馬尾名曰羴羊畢氏沅曰周書王會云高  
夷噍羊噍羊者羊而四角則亦或當爲噍聲相近衡  
案羴羊并不云四角疑非若北山經歸山有獸狀如  
麇羊四角馬尾而有距其名曰驩當與噍羊相似  
獨鹿叩叩距虛善走也



孔注獨鹿西方之戎也叩叩獸似鼠距虛負蹙而走

也盧本無鼠字今從王本補案  
羅願爾雅翼引亦有鼠字

補注王應麟曰周書史記篇阪泉氏徙居至於獨鹿  
注西戎地名爾雅西方有比肩獸焉與叩叩距虛比  
爲叩叩距虛齧甘草卽有難叩叩距虛負而走其名  
謂之蹙注呂氏春秋曰北方有獸其名爲蹙鼠前而  
兔後趨則頓走則顛然則叩叩距虛亦宜鼠後而兔  
前前高不能取甘草故須蹙食之今鴈門廣武縣夏  
屋山中有獸形如兔而大相負共行土俗謂之蹙鼠

穆天子傳叩叩距虛日走五百里宋符瑞志比肩獸  
王者德及矜寡則至說文作蛩蛩爾雅翼云沈括使  
遼稱契丹北境慶州之地大漠中有跳兔形皆兔也  
但前足纔寸許後則幾一尺行則用後足跳一躍數  
尺止則蹶然仆地此則蹙也叩叩距虛蓋二獸子虛  
賦曰蹙蛩蛩麟距虛張揖以爲叩叩青獸其狀如馬  
距虛似羸而小說苑孔子曰蛩蛩距虛見人將來必  
負蹙以走二獸者非性愛蹙也爲得甘草而貴之故  
也然則負蹙者或叩叩或距虛二物不相須也周書

王會注以爲叩叩似鼠距虛負而走則是以叩叩爲  
蹙也與爾雅說苑異今不取衡案獨鹿卽濁鹿一作  
涿鹿在今北直順天府涿州北括地志媯州懷戎縣  
東南五十里有涿鹿山懷戎縣今宣府鎮懷來衛山  
海經海外北經北海內有獸其狀如馬名曰駒駮有  
獸焉其名曰駮狀如白馬鋸牙食虎豹有素獸焉狀  
如馬名曰蛩蛩郭注卽蛩蛩距虛也一走百里見穆  
天子傳郭又于穆天子傳叩叩距虛走百里下注云  
亦馬屬尸子曰距虛不擇地而走山海經云蛩蛩距

虛并言之耳合觀郭氏二說則叩叩距虛爲馬屬信  
矣故山海經以蛩蛩與駒駮並言也相如子虛賦  
蹙蛩蛩躡距虛軼野馬轉陶駮案雖分蛩蛩距虛爲  
二然與野馬陶駮並舉則亦以爲馬屬矣故張揖注  
云蛩蛩青獸狀如馬距虛似羸而小李善曰蛩蛩卽  
距虛變文互言耳然則蛩蛩距虛有四字連名者獨  
鹿叩叩距虛是也有單呼距虛者孤竹距虛是也似  
羸似馬當亦相去不遠乃有爲鼠後免前之說者則  
始于爾雅比肩獸注蓋本淮南注前足長後足短之

說故其圖讚亦云蹙與距虛乍免乍鼠長短相濟彼我俱舉有若自然同心共膂也羅氏爾雅翼曰蹙惟前短而後長故不能走而有待於物然猶獸之長理若長前而短後豈直不能負物而已哉直便無是理也此說明快其引說苑二獸之說不可據劉勰謂蛩蛩巨虛其實一物是也蓋惟蛩蛩距虛爲一物故與蹙爲比肩若謂負蹙者或叩叩或距虛則連類而三矣其於比肩之義何居焉羅又謂周書注叩叩似鼠距虛負而走則是以蛩蛩爲蹙也今案孔氏注是距

虛負蹙而走乃脫引一蹙字遂謂與爾雅說苑異誤矣盧文弨曰正文似本無距虛二字爾雅叩叩距虛是一獸今此下文別出孤竹距虛注於叩叩則云似距虛於距虛則云野獸則知叩叩下距虛二字乃後人以所習聞妄增耳且於注中獸似下又增一鼠字則下距虛二字反贅矣故知此不與爾雅及呂氏春秋所說同也衡案孔注鼠字誤當作馬其所謂距虛負蹙而走者蒙上叩叩而言也若云孔注是叩叩似距虛則下文注距虛亦可云距虛似叩叩矣撲朔迷

離究爲何物

孤竹距虛

孔注孤竹東北夷距虛野獸驢騾之屬

補注王應麟曰爾雅觚竹在北荒地志遼西令支有孤竹城括地志孤竹故城在平州盧龍縣南十二里殷時諸侯國姓墨胎氏史記正義孤竹君是殷湯正月三日丙寅封相傳至夷齊之父衡案成王時孤竹君當是子朝中子之後路史國名紀孤竹今平之盧龍東有古孤竹城地道記在肥如南十二里秦之

離支縣漢令支也營州皆其地一作觚羅萃注本以孤生之竹可管而名之衡案周初孤竹與令支自爲二國故下文有不令支而齊語亦云北伐山戎荆令支斬孤竹也至秦漢時始併爲一故漢地理志遼西郡令支縣有孤竹城也據一統志今爲土默特二旗地又直隸永平府盧龍縣本商孤竹國尸子距虛不擇地而遠蓋以此物善走與叩叩距虛同故俱有距虛之號一則如馬而大一則似騾而小以爲類鼠兔者并非玉篇駉騶獸似騾崔豹曰驢爲牡馬爲牝卽

生騾馬爲牡驢爲牝生駮驢郭注子虛賦曰驪駮駮  
驢類也驪駮見史記匈奴傳徐廣曰驪音顛巨虛之  
屬漢匈奴傳作驪奚師古曰巨虛類也李善七發注  
引范子云千里馬必有巨虛

不令支玄獾

孔注不令支亦東北夷

亦舊訛作皆

獾白狐玄獾則黑狐

詩傳名物集覽云王會屠州有黑豹白豹別名獾

補注王應麟曰齊語北伐山戎制令支斬孤竹注二  
國山戎之與也令支今爲縣屬遼西孤竹之城存焉

括地志令支故城在平州盧龍縣七十里爾雅獾白  
豹注似熊小頭庠脚黑白駮能舐食銅鐵及竹骨骨  
節強直中實少髓皮辟濕或曰豹白色者別名獾說  
文似熊而黃黑色出蜀中南中志曰豹大如騾狀頗  
似熊多力食鐵所觸無不拉廣志曰豹色蒼白其皮  
溫煖衡案令支一曰離支見史記齊世家一曰冷支  
見管子小匡一曰離枝見管子輕重甲一曰零支見  
路史後紀注一曰令疵見呂氏春秋有始覽與淮南  
墜形訓注云令疵在遼西一曰令止見淮南時則訓

本作令正太平御覽作令止案卽令支也漢志遼西郡令支應劭曰令音鈴孟康曰支音祇師古曰令又音郎定反一統志直隸永平府令支故城在遷安縣爲春秋時山戎屬國漢置縣魏書地形志肥如縣有令支城通典盧龍有漢令支縣城楊慎曰古地名多有丕字如春秋之丕美華不注史之丕周丕姜丕耐山海經之丕津不庭不其或曰不讀作丕古無丕字不卽丕也據此則不令支及下文不屠何之不俱當讀如丕然華不注之不音柎以爲盡作丕字讀亦非

通雅載不字有十四音則王會二不字係助語辭如句吳于越之類

不屠何青熊

御覽九百八引王會成王時不屠何國獻青熊一字添設

孔注不屠何亦東北夷也

補注王應麟曰管子曰桓公敗胡貉破屠何注屠何東胡之先也說文熊似豕山居冬蟄上林賦注犬身人足鄧立誠曰漢書地理志遼西郡有令支縣又有徒河縣徒河卽屠何也晉時有段務勿塵者徒何種也衡案王會屠何與東胡並稱是周初現隸此二國

管子小匡注以爲東胡之先誤矣漢徒河縣在今直隸永平府大寧衛東百九十里錦縣西北段長基歷代疆域表曰相傳虞舜時已有此城劉恕外紀周惠王三十三年齊桓公救燕破屠河卽徒河

東胡黃羆

孔注東胡東北夷

補注王應麟曰伊尹朝獻商書正北東胡山海經大澤在雁門北東胡在大澤東匈奴傳燕北有東胡服虔曰烏桓之先也後爲鮮卑爾雅羆如熊黃白文似

熊而長頭高脚猛憨多力能拔樹木關西呼曰貊羆詩韓侯其追其貊奄受北國獻其黃羆陸璣疏羆大於熊淮南子散宜生得玄豹黃羆以獻於紂衡案一統志鮮卑今爲敖漢奈曼喀爾喀蘇尼特諸旗地羆狀如糜其川在尾上見北山經孫炎曰羆如熊而力大於熊有赤黃二種而古者以黃爲貴

山戎戎菽

孔注山戎亦東北夷戎菽巨豆也

補注王應麟曰匈奴傳燕北有山戎山戎越燕而伐

齊史記正義今奚國杜預曰山戎北狄無終三名一也括地志幽州漁陽縣本山戎無終子國漢書戎菽注胡豆也管子桓公北伐山戎以戎菽遍布於天下衡案一統志山戎今為喀喇沁三旗地段長基歷代沿革表曰直隸承德府即雍正元年熱河廳舊境古為山戎北齊庫莫奚地隋唐併為奚地爾雅戎菽謂之荏菽郭注即胡豆也大雅生民蓺之荏菽毛傳荏菽戎菽也鄭箋戎菽大豆也案爾雅釋詁戎壬大也壬通作荏故荏菽戎菽皆謂之大豆也魯莊公三十

年齊人伐山戎三十一年齊人來獻戎捷穀梁傳曰戎菽也

其西般吾白虎黑文

黑文二字舊缺鄭志張逸問詩傳白虎黑文答曰周書王會云又詩釋文

騶虞義獸也白虎黑文不食生物有至性之德則應之周書王會草木疏並同今據補

孔注次西也般吾北狄近西

補注王應麟曰說文彪白虎也爾雅彪白虎瑞應圖

白虎者仁而不殺王者不暴虐恩及行葦則見淮南

子散宜生得白虎獻紂衡案般吾國名無考王引淮

南子散宜生得白虎獻紂參以詩騶虞釋文則與上



文央林酋耳相似釋文又有尾長于身不履生草之說則是既以酋耳爲騶虞又以白虎爲騶虞必有一誤余謂上文酋耳蓋另一獸但以尾長參其身與山海經騶虞同後人遂誤以爲卽騶虞也此白虎黑文乃眞騶虞若散宐生所得以獻之紂者乃是騶吾馬故曰得騶虞雞斯之乘案太平御覽八百九十騶虞引說文詩國風騶虞草木蟲魚疏山海經竝以白虎爲騶虞也又引宋書曰元嘉二十六年琅邪有白騶虞據此則般吾卽般虞蓋以地出騶虞卽以是名其

國如山海經梟陽國楊雄傳後陶塗師古曰國名出駒駮是已般音班周禮天官內饗馬黑脊而般臂螻注般臂臂毛有文楊雄羽獵賦屨般首如淳曰般音斑斑首虎之頭也張衡西京賦奮鬣被般李善注毛萇曰鬣般虎皮也上林賦曰被斑文般與斑古字通又史記司馬相如傳般般之獸樂我君王注謂騶虞也則般吾卽騶虞之轉洵爲定論矣或以宋書琅邪出騶虞證之則般吾國當在周青州左近漢地理志濟南郡有掖陽縣掖卽般蓋以其地在般水之陽也

山海經北山經沂山般水出焉而東流注於河沂山當卽職方青州之鎮山郝懿行以漢志平原郡般當之又謂卽爾雅九河鉤盤案平原郡濟南郡俱隸青州刺史部與琅邪郡之隸徐州者相去不遠則般吾或卽以般水得名亦通故竝錄之以俟考焉

### 屠州黑豹

孔注屠州狄之別也

補注王應麟曰晉史北狄有屠各山海經幽都山多玄虎玄豹散宜生得玄豹列女傳南山有玄豹爾雅

大 魑黑虎衡案異物志有西屠爾雅疏有東屠又路史黃帝戮蚩尤遷其善者於鄒屠高陽氏取於鄒屠此屠州未知孰是幽都山見海內經又中山經卽谷之山多玄豹

### 禹氏駒駘

孔注禹氏西北戎駒駘馬屬

補注王應麟曰管子曰堯舜之王北用禹氏之玉注西北戎名又曰玉幣有七筴禹氏邊山之玉一筴也伊尹朝獻商書正北以駒駘爲獻山海經北海內有

獸狀如馬名駒駮色青字林北狄良馬也一曰野馬  
瑞應圖云幽隱之獸也有明王在位卽至說文野馬  
之良也史記匈奴奇畜則駒駮音陶塗顏師古曰出  
北海中其狀如馬非野馬也楊雄傳前番禺後陶塗  
師古曰國名出駒駮段玉裁曰如淳漢書注曰駒駮  
野馬也蓋用爾雅爲訓顏氏駁之誤矣駒駮爲北野  
之良馬故謂之野馬衡案管子北用禺氏之玉見揆  
度篇爾雅駒駮馬野馬說文駒駮北野之良馬也

大夏茲白牛茲白牛野獸也牛形而象齒

盧文弨曰舊本正文止大夏茲

白牛五字下十一字誤入注中惠據洪本增入正文與初  
學記正同今從之衡案茲白牛野獸也六字當衍不然則  
孔注何用  
復述耶

孔注大夏西北戎茲白牛野獸似白牛形

補注王應麟曰伊尹朝獻商書正北大夏山海經國  
在流沙外者大夏史記大夏在大宛西南二千餘里  
管子桓公西伐大夏涉流沙衡案流沙見海內東經  
史記大宛傳王所引管子見史記封禪書三國志注  
引魏略曰西王母西有修流沙修流沙西有大夏茲  
白牛卽駮牛案前有茲白馬是駮馬白駮音相近說

文犖駁牛也

犬戎文馬而赤鬣縞身

盧本文馬二字重無而字

目若黃金名古黃之

乘

古黃初學記二十九引同山海經郭注引作吉黃

孔注犬戎西戎之遠者

補注王應麟曰山海經白犬有牝牡是為犬戎書傳

文王伐犬夷匈奴傳西伯伐吠夷即吠戎也隴以西

有吠戎山海經犬封國曰犬戎國狀如犬有文馬縞

身朱鬣目若黃金名曰吉量乘之壽千歲注六韜曰

文身朱鬣眼若黃金項若雞尾名曰雞斯之乘書大

傳散宜生之犬戎氏取美馬駁身朱鬣雞目者取九

六焉瑞應圖騰黃神馬一名吉光說文馬赤鬣縞身

目若黃金名曰媽吉皇之乘周文王時犬戎獻之衡

案犬戎黃帝之後見大荒北經又犬封國曰犬戎國

見海內北經說文文王二字誤案文王時是取之犬

戎以獻紂而犬戎來獻則成王時也

數楚每牛每牛者牛之小者也

孔注數楚北戎

補注王應麟曰爾雅注擺牛庫小今之馮牛也又呼

果下牛衡案地名以類舉者如西號北號南號南亭  
北亭西亭以及黑齒金齒銀齒東越西越百濮百粵  
之類不可枚舉則數楚疑亦荆楚之別如國名紀所  
載西楚南楚東楚以及鬻郢諸國是已郭注犏牛謂  
果下牛出廣州高涼郡又寰宇記謂九德出果下牛  
則數楚當是南蠻孔謂是北戎不可考邵晉涵曰犏  
牛卽每牛也犏每聲之轉廣韻以犏爲牛名卽犏牛  
之別名盧文弨曰西山經黃山有獸如牛而蒼黑大  
目其名曰犏郭音敏畢氏沅云廣韻音切同美與此

每牛合

匈奴狡犬狡犬者巨身四足果皆北嚮

四足舊作四尺

孔注匈奴北戎

盧從王本北戎上有  
賊字今從舊本刪

補注王應麟曰伊尹朝獻商書正北匈奴晉灼曰堯  
時曰葷粥周曰獫狁秦曰匈奴通典云山海經已有  
匈奴爾雅疏五狄三曰匈奴說文狡少狗也匈奴有  
狡犬巨口而黑身衡案匈奴見海內南經又見王會  
解及伊尹四方令非始於秦也狡狗見淮南傲真訓  
顏注急就篇狡犬匈奴中大犬也鉅口而赤身瑞應

圖云匈奴獻豹犬錐口赤身四足二說俱云赤身與  
說文異案羅山記云羅山有獸小似猿猴名果下豹  
與瑞應圖豹犬之說合然師古謂是匈奴中大犬則  
又非小似猿猴之謂或曰果與倮通謂竊毛也蓋如  
虎豹之屬山海經西山經玉山有獸焉其狀如犬而  
豹文其角如牛一作羊其名曰狡其音如吠犬見則其  
國大穰郝懿行曰此經狡無犬名周書狡犬又不道  
有角疑未敢定衡案山海經明云其名曰狡又云其  
狀如犬其音如吠犬尙有何疑盧文昭曰梁云四足

果蓋足短之稱

權扶玉目

孔注權扶南蠻目玉玉之有光明者形小也

末三字疑衍

補注左傳莊公十八年楚武王克權遷權於那處注  
南郡當陽縣東南有權城南郡編縣東南有那口城  
水經注權水東南流逕權城北古之權國也東南有  
那口城權國疑卽權扶昌黎權德輿墓碑云武丁之  
子降封於權權江漢國也國名紀云高陽氏後有權  
扶案高陽氏後多封於楚權扶卽權扶之誤今湖北

安陸府古蹟有權城在鍾祥縣西南玉目不知何物  
王應麟引相玉書珽玉六寸明白照亦與此不合

白州比閭比閭者其華若羽伐其木以為車終行不敗其華

當作其葉

孔注白州東南蠻與白民接也水中可居曰州州中

出此珍木案白州既是東南蠻則不得與白民接以白民在西故也

補注王應麟曰爾雅疏戎類有老白廣志櫻一名并

閭葉似車輪比閭疑亦并閭之類衡案國名紀三皇

之世有白阜國此白州不知即其後否也比閭即并

閭史記司馬相如傳仁頻并閭或曰比閭即花欄欄

與閭通比則花字形近而誤也舊作北閭誤周文歸

載陳渙子曰車出北閭因其地名之亦非

禽人營御覽九百九十六營類引周書成王時會稽人獻以營下注云會或作禽亦東南蠻營草堅韌案引

作會稽誤

孔注亦東南蠻營草堅忍盧文弨曰忍讀為韌

補注國名紀高陽氏後有禽人或謂即山海經海外

南經之羽民亦見淮南墜形訓呂氏春秋求人篇作

羽人爾雅白華野菅注茅屬說文菅茅也陸璣云菅

似茅而滑澤無毛根下五寸中有白粉者柔韌宜爲  
索

路人大竹

孔注路人東南蠻貢大竹

補注王應麟曰鄭語北有路洛泉徐蒲注皆赤翟隗  
姓春秋赤狄潞氏山海經長石山之西有共谷其中  
多竹衛邱之山竹林在焉大可爲舟岳山尋竹生焉  
衡案赤狄潞氏在今山西潞安府潞城縣漢志上黨  
郡潞縣古潞子國是也與所謂東南蠻不合據一統

志雲南有潞江此路人當在其左近大竹卽所產濮  
竹也或謂四川順慶府有大竹故城在渠縣北以邑  
界多產大竹爲名據此則路人亦當是西南夷

長沙鼈

孔注特大而美故貢也

補注王應麟曰湘川記秦分黔中以南長沙鄉爲長  
沙郡衡案一統志湖南長沙府古三苗國地春秋戰  
國屬楚秦置長沙郡漢爲長沙國通典有萬里沙祠  
故曰長沙又岳州府衡州府永州府寶慶府桂陽州



道州郴州俱秦長沙郡地今據王會已有長沙則秦漢蓋沿舊名也國名紀陶唐氏後有長沙

其西魚復鼓鐘鐘牛

孔注次西列也魚復南蠻國貢鼓及鐘而似牛形者美遠致也

補注王應麟曰左傳魚人注魚復今巴東永安縣十道志夔州春秋時魚國漢爲巴郡魚復縣鐘牛未詳衡案左傳魚人注見文公十六年國名紀魚魚人逐楚者長楊之魚城也舊云魚復衡案魚復已見王會

漢置縣因此一統志四川夔州府奉節縣春秋時庸國之魚邑鼓鐘鐘牛孔謂貢鼓及鐘而似牛形者其解似鑿案山海經中山經有鼓鐘山水經河水注有鼓鐘城此鼓鐘是國名蓋依山以立國者其地產銅故鑄鐘以獻而刻牛形于上以爲飾故謂之鐘牛蓋謂鼓鐘貢鐘牛而魚復所貢疑闕或謂當是魚復牛鼓鐘鐘其文法蓋如禽人管長沙鼈一例後人傳寫訛錯而孔氏亦未及校正也

蠻揚之翟

孔注揚州之蠻貢翟鳥

補注王應麟曰禹貢揚州有島夷翟雉名徐州羽畎  
夏翟左傳注南方曰翟雉爾雅鶴山雉注長尾者疏  
云今俗呼山雞衡案路史後紀注揚越卽揚粵是爲  
蠻揚或作揚雩非也又國名紀揚雩吳起爲楚收揚  
越者揚州之分下注云見王會解或云蠻婺州也本  
屬會稽郡國志云東越之地爲東揚州衡案今本王  
會解無揚雩二字疑卽後紀注所謂蠻揚也雩當是  
粵之誤史記南越傳秦并天下略定揚越置桂林南

海象郡張晏曰揚州之南越也揚越漢書南粵王傳  
作揚粵師古曰本揚州之分故名揚粵

倉吾翡翠翡翠者所以取羽

孔注倉吾亦蠻翠羽其色青而有黃也

補注王應麟曰山海經南方蒼梧之邱禮記注蒼梧  
於周南越之地楚吳起南并蠻越遂有蒼梧漢有蒼  
梧王趙光後平南粵以其地爲蒼梧郡爾雅翠鵠注  
似燕紺色生鬱林伊尹朝獻商書正南翠羽異物志  
曰翠鳥似鸞翡翠赤而翠青其羽可以爲飾交州記翡

翠出九真頭黑腹下赤青縹色似鷓鴣衡案蒼梧之  
邱見海內經戰國策蘇秦說威王曰南有蒼吾國名  
紀高陽氏後有蒼梧案今廣西梧州府爲古蒼吾地  
說文翡赤羽雀也翠青羽雀也出鬱林邵氏爾雅正  
義引博物志翡通身黑惟胸前背上翼後有赤毛翠  
通身青黃惟六翮上毛長寸餘青其飛則羽鳴翠翡  
翠翡然因以爲名也

案今本博物志無此文太平御覽亦不見引此語俟考

其餘皆可知自古之政

孫鑛曰自古之政宜在伊尹字上

孔注餘謂衆諸侯貢物也言政化之所致也

補注王應麟曰書旅獒曰明王慎德四夷咸賓無有  
遠邇畢獻方物惟服食器用而此篇諸方致貢無所  
不有蓋遠人來慕以其寶贄而不寶遠物以庶邦惟  
正之貢乃成王之心也衡案惟正之貢歲有常入此  
因周公將歸政成王且因東都既成故大會諸侯於  
其地以示天下無不臣服於成王而四夷亦罔不輸  
誠來獻其在王朝視之則彼爲異物而以諸國所貢  
言之則皆爲土產非難得之寶也蓋將大一統以示  
殷遺小腆罔敢竊發故特繼多士多方之誥而爲是

會歟

南人至衆皆北嚮

此七字疑當在其餘上

孔注南人南越

補注王應麟曰朱子曰山海經記諸異物飛走之類多云東南或云東首皆為一定不易之形疑本依圖畫而為之古人有圖畫之學如九歌天問皆其類愚謂此篇亦然鄭康成注禮許叔重說文皆稽以為證蓋周書著錄于劉略班志非晉時始出繫之汲冢失其本矣閱覽洽聞之士如郭景純王元長援述者不

一宐與禹貢職方竝傳敘事之祖也若禹四海異物載於大傳湯四方獻令附於王會合而觀之三代之典粲然矣衡案古人圖畫之學甚重然在成周當日秉筆者依次而序蓋得之目驗非按圖而寫也

伊尹朝獻商書

孔注不錄周書中

錄字舊在周書下今改正

以事類來附

十字舊作正文

又以王注言別有此書也六字竄入為伊尹朝獻商書下之注今俱改正

補注王應麟曰言別有此書也王會俱朝貢事故令附合衡案自此以下蓋另一篇乃商書也如周祝解

前另有殷祝解蓋各自爲篇序書者以其事相類遂  
附入焉

湯問伊尹曰諸侯來獻或無馬牛之所生而獻遠方之物  
事實相反不利

孔注非其所有而當遠求於民故不利也

今吾欲因其地勢所有獻之必易得而不貴其爲四方獻  
令

孔注制其品服之令

補注竹書紀年湯二十五年定獻令卽此事

伊尹受命於是爲四方令曰臣請正東符婁仇州伊慮漚  
深九夷十蠻越漚鬻髮文身

孔注九十者東夷蠻越之稱

王本稱上有別字

鬻髮文身因

其事以名之也

補注王應麟曰符婁後漢東夷傳有夫餘國在玄菟  
北挹婁古肅慎之國仇州伊慮來詳仇州海中洲漢  
遼東郡有無慮縣顏氏注卽所謂醫無閭伊慮卽醫  
閭也漚深卽甌也九夷東夷傳夷有九種曰畎夷干  
夷方夷黃夷白夷赤夷玄夷風夷陽夷竹書紀年后

芬三年九夷來御孔子欲居九夷爾雅疏九夷一曰  
玄菟二樂浪三高驪四滿飾五鳧更六索家七東屠  
八倭人九天鄙十蠻書武王通道于九夷八蠻職方  
四夷八蠻蠻類有八天竺咳首焦僥跛踵穿胸儋耳  
狗軹旁脊爾雅六蠻此言十蠻言其非一而已越禹  
之苗裔封會稽世本芊姓東越閩君皆其後又交趾  
之南有越裳國漚亦甌也鬻髮垂史記越文身斷髮  
趙世家云翦髮文身甌越之民也吳世家注常在水  
中故斷其髮文其身以象龍子故不見傷害地理志

以避蛟龍之害王制東方曰夷被髮文身通典文身  
國梁時聞焉在倭東北人體有文如獸額上有三文  
衡案呂氏春秋恃君覽有縛婁國拾遺記成王時有  
扶婁之國縛婁扶婁符婁一也仇州或云浙江杭州  
府有仇山在餘杭縣北十五里下有仇溪不知卽仇  
州故址否也伊慮郝懿行謂卽海內南經之伯慮國  
漚深疑卽曰深九夷則東夷傳所載是已十蠻蓋夏  
末殷初之際其類有十與周八蠻不同且此是東十  
蠻錯處九夷者與爾雅六蠻專指南方者又別越漚

卽東越漚人郭注山海經所謂今臨海永寧縣卽東  
甌在歧海中是也淮南原道訓九疑之南陸事寡而  
水事衆於是民人被髮文身

講令以魚皮之鞞烏鯢之醬鮫厥利劍爲獻

鞞布頂反

孔注鞞刀削鯢魚名厥盾也以鮫皮作之鮫文魚也  
補注王應麟曰左傳注鞞佩刀削上飾詩鞞琫有琕  
正義今刀削說文烏鯢魚名荀子楚人鮫革爲甲方  
言盾或謂之厥後漢志佩刀乘輿半鮫魚鱗山海經  
注鮫皮可飾刀劍口本草注沙魚一名鮫衡案魚皮

鮫魚皮鞞刀室也烏鯢魚一名烏賊一名墨魚醬蓋  
以烏鯢骨爲之利劍干將莫邪之類

正南甌鄧桂國損子產里百濮九菌

御覽七百九十一引歐鄧作歐陞下注云

五來反又損子作指子產里作六童

孔注六者南蠻之別名

補注王應麟曰百濮見左傳鄧曼姓甌卽甌駱山海  
經桂林八樹在番禺東秦南取百粵之地爲桂林郡  
漢曰鬱林餘未詳後漢注里蠻之別號今呼爲俚人  
衡案爾雅六蠻本殷制或卽此與上文東十蠻異左

傳巴濮楚鄧吾南土此歐鄧疑卽鄧國之先姓纂四  
十八嶜鄧氏殷時侯國卽此漢書地理志南陽郡鄧  
都尉治注應劭曰鄧侯國案一統志湖北襄陽府有  
鄧縣故城在襄陽縣北春秋時鄧國路史國名紀桂  
國見伊尹四方令經云八桂在賁禺東蓋桂陽也衡  
案桂林八樹見海內南經郭注賁禺今番禺縣蓋以  
縣以有番山禺山得名山今在廣東廣州府損子無  
考案墨子節葬云越東有鞫沐之國其長子生則解  
而食之謂之空弟此損子國當似之鞫太平廣記引

作軼博物志作駭後漢書南蠻傳謂之叟人國其實  
一也國名紀曰產里一云語兒也或作陸童誤衡案  
後漢書建武十三年九真徼外蠻里張游率種人慕  
化內屬封爲歸漢俚君王氏所引里蠻之別號二語  
卽此處注據南州異物志謂俚在廣州之南蒼梧鬱  
林合浦寧浦高涼五郡中央地方數千里則俚在廣  
東廣西境內檢一統志廣東瓊州府有黎峒黎爲蠻  
之別號後漢謂之俚人俗訛俚爲黎此卽王所據以  
爲里人者也然又係一種據一統志雲南普洱府禹



貢梁州荒裔本古產里地又古蹟舊車里軍民宣慰  
司在府城南七百四十五里古產里地段長基歷代  
沿革表曰普洱府古產里也一名車里呂覽曰產里  
以象齒短狗爲獻周公作指南車導之歸故曰車里案  
以象齒短狗爲獻是逸周書非呂覽也百濮見文十  
六年高士奇春秋地名考略曰左傳楚大饑戎伐其  
西南庸人率羣蠻以叛楚麋人率百濮聚于邈杜注  
百濮夷也昭元年魯爲邾所愬趙孟爲魯請于楚曰  
吳濮有鬯杜注吳在東濮在南今建寧郡南有濮夷

九年詹桓伯曰巴濮楚鄧吾南土也十九年楚子爲  
舟師以伐濮杜注濮南夷杜氏三注不同蓋以種族  
不一故稱百濮約言其地當在楚之南境而迤西矣  
晉建南郡在今雲南界極言所至當在此也左思三  
都賦曰左綿巴中百濮所充劉注云今巴中七姓有  
濮是蓋百濮之一種轉徙於此非春秋所云矣衡案  
文十六年釋例曰建寧郡南有濮夷濮夷無君長總  
統各以邑落自聚故稱百濮也國名紀曰九茵四方  
令在正南今九江之茵江衡案海內南經有茵山有

桂山疑桂國與九菌皆在其左近今廣東桂山所在多有或曰九菌即九真菌真一聲之轉

請令以珠璣瑋舊作瑋象齒文犀翠羽菌鶴短狗為獻

孔注璣似珠而小菌鶴可用為旌翳短狗狗之善者也

補注史記江南出丹沙犀象瑋珠璣後漢書賈琮傳交趾土多珍產明璣翠羽象犀瑋瑁異香美木之屬梁祚魏國統曰西南有夷名尾濮其地出瑋瑁犀象珠璣金銀葛越桂木山海經海內經有青獸如菟

名曰菌狗郭注音如朝菌之菌郝懿行曰菌狗者周書王會篇載伊尹四方令云正南以菌鶴短狗為獻疑即此也衡案菌鶴短狗是二物郝以為一物誤矣蓋菌鶴是九菌所產之鶴故曰菌鶴短狗或亦九菌所出故菌狗在海內經而菌山亦列其次也蓋菌人短小其所產之物亦可類推故在山海經本其所出則曰菌狗而在獻令象其形狀則謂之短狗歟山海經曰青獸如菟可以證矣案一統志雲南順寧府土產有矮犬毛深足短即竹書所謂短狗盧文昭曰短

狗王本作矩狗蓋因注云狗之善者故以為當作矩耳考唐幽州昭仁寺碑有云豈止菌鶴短狗西鯁東鰈之貢而已哉正用此文則作短狗為是衡案駢雅云菌狗兔屬蓋據山海經如兔之說薛傳均曰短狗即獬說文獬短頸狗

正西昆侖狗國鬼親枳已闕耳貫胸雕題離邱漆齒

盧文昭曰

後漢書注引狗國作狗骨又引離邱作雕邱衡案後漢西南夷注引作離邱又文選王融曲水詩序注引周書離身染齒之國以龍角神龜為獻

孔注九者西戎之別名也闕耳貫胸雕題漆齒亦因

其事以名之也

補注王應麟曰禹貢織皮昆侖王肅曰昆侖在臨羌

西狗國犬戎也唐天文志聲教所不暨皆係于狗國

鬼親鬼方也通典流鬼在北海之地鬼國在駁馬國

西枳已未詳左傳衛侯入于戎州已氏在楚邱縣爾

雅疏蠻類有狗軼闕耳山海經有聶耳離耳國呂春

秋北懷闕耳貫胸山海經其為人胸有竅尸子曰貫

匈者黃帝之德嘗致之爾雅疏蠻類有穿胸雕題王

制曰南方曰蠻雕題雕刻鏤也題額也刻其肌以丹

青涅之山海經有彫題國通典百越古謂之雕題離  
身山海經有三身國一首三身漆齒山海經有黑齒  
國齒如漆後漢東夷傳自朱儒東南至黑齒國唐黑  
齒常之百濟西部人衡案昆侖國名見禹貢孔傳謂  
在荒服之外流沙之內管子輕重甲曰崑崙之虛不  
朝又曰簪珥而辟千金者瑯琊玕也然後八千里  
崑崙之虛可得而朝也朱長春曰崑崙去中國甚遠  
而此曰八千里意西番別有各國如小西天之類萬  
斯同羣書疑辨曰孔氏謂在流沙之內則其地當在

今沙州去肅州嘉峪關不甚遠衡案南夷志崑崙國  
北去四洱河八十日程御覽列之南蠻部見七百八  
十九據一統志崑崙山在今甘肅肅州西南狗國見  
淮南墜形訓賈子脩務郭注山海經犬戎國引盤瓠  
生男爲狗生女爲美人之說不可據玄中記云高辛  
氏犬戎爲亂帝之狗名盤瓠殺犬戎以其首來帝以  
女妻之於會稽東海生男爲狗生女爲美人此說不  
經之至夫旣曰犬戎爲亂則是立國自高辛以前矣  
安得引以證犬封國所托始乎路史發揮論槃瓠之

妄曰子稽夏后氏之書伯益經云卞明生白犬是爲  
蠻人之祖卞明黃帝氏之曾孫也白犬者乃其子之  
名蓋若後世之烏魁犬子豹奴虎狔云爾非狗犬也  
而應劭書遂以爲高辛氏之犬名曰槃瓠妻帝之女  
乃生六男六女自相夫婦是爲南蠻至郭璞張華于  
寶范蔚宗李延壽梁載言樂史等各自著書枝葉人  
以喜聽而事遂實矣此論甚暢陳士元江漢叢談所  
闢南蠻傳尤快其略曰杜君卿據漢書辨之謂黃金  
占以斤計至始皇以二十兩爲一鎰今日黃金萬鎰

非古制也吳姓至周始有而將軍乃周末之官今日  
吳將軍非古制也杜君卿之辨是矣而未得其實余  
謂高辛之代本無犬戎之患高辛都亳卽今河南偃  
師而犬戎在西陲蠻土在南陲去亳各數千里荒服  
之外以一犬之力旣能西走數千里銜吳將軍之首  
歸致闕下而又能負帝女南走數千里飛渡洞庭棲  
宿於武陵之石窟不餓乏哉此其理悖矣然則卽以  
槃瓠爲南蠻之祖尙且不可況欲托以爲犬戎之先  
乎鬼親疑卽王季所伐之西落鬼戎枳已楚地戰國

策蘇代約燕王曰楚得枳而國亡案一統志枳在今四川重慶府涪州漢置枳縣屬巴郡然則枳已或枳巴之誤又湖北襄陽府有郢縣故城在宜城縣東北本楚邑水經注沔水南過卽縣東縣故楚邑也據此則枳已疑卽枳卽在殷初爲西南夷小國至戰國時入於楚亦通鬪耳卽海外北經之聶耳大荒北經之儋耳淮南墜形有耽耳博物志有檐耳皆謂是也海外南經又有離耳國郝懿行謂是南儋耳又引四方令離耳以證之案四方令有鬪耳有離邱無所爲離

耳也蓋以文選注而誤郝又以海內北海經之鬪非謂卽鬪耳案鬪非與環狗皆怪異之物如蝮犬窮奇大蠡大蟹陵魚大鰓等類不得謂是國名郝謂鬪非卽鬪耳環狗卽狗國俱誤案漢地理志犍爲郡漢陽有鬪谷匈奴傳有鬪敦師古曰鬪音蹋敦音頓鬪頓又見後漢馮異傳附錄侯考貫胸卽穿胸見海內南經在載國東淮南墜形訓有穿胸民高誘注穿胸胸前穿孔達背博物志穿胸人去會稽萬五千里雕題國亦見海內南經今據四方令列於正西豈雕題貫

胸二國國於西南隅故其方可兩屬歟離邱文選注  
引作離身王氏引三首國一首三身以解非是案後  
漢書東離國治莎奇城在天竺東南三千餘里御覽  
列於西戎又呂氏春秋恃君覽離水之西注西方之  
戎未知卽離邱故地否也漆齒西黑齒也曲水詩序  
注引作染齒可爲西屠染齒之證

請令以丹青白旄紕罽江厯龍角神龜爲獻

後漢書西南夷傳注引無

江厯二字

孔注江厯珠名龍解角故得也

補注王應麟曰荀子南海有曾青丹于西海有文旄  
何承天纂文曰紕氏罽也卑疑反衡案丹青卽山海  
經丹粟丹矐青雄黃之類尙書大傳丹邱出丹矐青  
邱出青矐白旄白牛尾也紕飾也詩傳紕所以織組  
也漢書高祖紀注罽織毛若今毳及氍毹之類說文  
罽西戎毳布也衆經音義卷一引通俗文云織毛曰  
罽盧文弔曰後漢西南夷傳丹矐夷其人能作毳毼  
筆卽紕也衡案江厯卽江驪說見顧氏音學五書唐  
韻卷十九引楊慎語龍角龍脫之角也神龜見爾雅

長尺二寸

正北空同大夏莎車姑他旦略豹胡代翟匈奴樓煩月氏  
熾犁其龍東胡

孔注十三者北狄之別名也代翟在西北界戎狄之  
閒國也

補注王應麟曰空同爾雅北戴斗極爲空桐黃帝西  
至于空桐山史記趙襄子娶空同氏大夏在西域月  
氏擊而臣之淮南子空同大夏楊子大夏之西莎車  
國治莎車城姑他未詳趙世家北滅黑姑旦略未詳

豹胡北胡也代北狄之別秦漢代縣今蔚州翟與狄  
同晉語翟祖又赤翟隗姓匈奴見山海經殷曰獯粥  
周曰獯狁樓煩在晉北趙武靈王北破樓煩月氏居  
敦煌祁連閒與匈奴同俗熾犁其龍未詳漢匈奴傳  
有昆龍新羣國東胡在燕北見山海經燕秦開龔破  
東胡秦時東胡彊月氏盛漢鮮卑東胡之支也烏桓  
本東胡唐契丹奚本東胡種爾雅疏狄類有五月支  
穢貊匈奴單于白屋衡案空同見淮南汜論訓一作  
空桐見爾雅又作崆峒蓋依山立名亦猶正西之昆



卷十七  
俞也史記趙世家襄子娶空同氏正義曰括地志云  
崆桐山在肅州福祿縣東南六十里古西戎地又原  
州平高縣西百里亦有崆峒山卽黃帝問廣成子道  
處俱是西戎地未知孰是衡案崆峒山在今甘肅平  
涼府平涼縣西一名笄頭山一名薄落山此空同國  
當在其左近又史記殷本紀殷後有空桐氏左哀二  
十六年杜注梁國虞縣東南有地名空桐亦見路史  
國名紀此商湯後國非四方令所謂空同也大夏見  
前莎車城去長安九千九百五十里見漢西域傳魏

書渠莎國居故莎車城史記大宛傳樓蘭姑師邑姑  
師姑他疑一地也或曰姑他虛沱一聲之轉耳且略  
未詳或曰略蓋貉字之誤豹胡豹當作貊山海經海  
內西經貊國在漢水東北地近于燕詩大雅韓奕其  
追其貊傳貊國名代翟戰國時趙地趙襄子滅代以  
封伯魯子周爲代成君漢地理志代郡應劭曰古代  
國漢代郡屬幽州匈奴樓煩俱見上案一統志匈奴  
今爲喀爾喀四部七十四旗地月氏在流沙外見海  
內東經漢書西域傳大月氏國治監氏城去長安萬

一千六百里北史大月氏北與蠕蠕接案一統志甘肅甘州府涼州府俱禹貢雍州域戰國及秦爲月氏地又古大月氏國在土魯番界又新疆愛烏罕爲漢大月氏國在拔達克山布哈爾之西南熾犁或謂卽薪犁國漢西域傳有蒲犁又有渠犁未知誰是也龍城見匈奴傳漢書作龍城崔浩云西方胡皆事龍故名大會處爲龍城此其龍當在其左近東胡見上廣韻引前燕錄云昔高辛氏游於海濱畱少子厭越以居北夷邑於紫蒙之野號曰東胡

請令以橐駝白玉野馬駒駘馱良弓爲獻

文選李斯上秦始皇書注

引周書正北以馱馱爲獻

補注王應麟曰漢西域傳大月氏出一封橐駝唐吐蕃獨峯駝日馳千里爾雅野馬如馬而小出塞外鮮卑有野馬馱馱駿馬也生七日而超其母後漢東夷傳句驪別種名小水貊出好弓所謂貊弓衡案橐駝漢匈奴傳作橐他師古曰橐他言能負囊橐而馱物也西域傳鄯善國多馱駝廣志天竺北多馱駝白玉出于闐國子虛賦軼野馬而轉駒駘駒駘是野馬之

良而野馬則槩舉之辭耳高誘淮南主術訓注駒駮  
野馬也楊升菴謂盜驪一名温驪又作駒栗後代轉  
名爲駒駮衡案駒駮之名既見山海經又見王會四  
方令而盜驪始見穆天子傳楊說倒置不足據說文  
駮駮馬父羸子也御覽引尸子云駮之言起駮之言  
踉疾走之名也

湯曰善

逸周書卷十七終



